



册府元龜
卷之二百十七
至十九



13
849
74



門
849
卷
74



册府元龜

淮南李嗣京參閱

西極文翔鳳訂正

豫章黃國琦較釋

閏位部

三十六

交侵

春秋傳曰疆場之事一彼一此何嘗之有當鼎國分
携暨南北更王迄於朱梁威務兵戰用寧守宇至乃
略地以闢國攻城以拓土爭要害之形勢騁變詐之
機略金革亟舉燧燧日燔飛輓相望污菜罔治士衆

疲於轉鬪邊城患於驛騷而復勝敗相尋虛兀更伺
或知難而退獲免於數奔或允當而歸克遵於善志
抑兵者不祥之器盖不得已而用之若乃爭尋嘗以
盡其民恃疆大而好於戰曷嘗不治失律之咎而貽
自焚之釁哉

蜀先主章武元年七月帥諸軍伐吳

其未卽位前交
侵事且勳業門

忿其襲殺關羽也吳王遣書請和先主盛怒不許吳
將陸議李異劉阿等屯巫秭歸將軍吳班馮習自巫
攻破異等軍次秭歸五溪蠻夷遣使請兵
二年正月先主軍還秭歸吳班陳式水軍屯夷陵夾

江東西岸五溪蠻夷咸相響應鎮北將軍黃權督江

北諸軍與吳軍相拒於夷陵道夏六月為陸議所破

將軍馮習張楠等皆沒先主自猓亭

猓音許
交切

還秭歸

收令離散兵遂棄船舫繇步道還魚復

今萬
州是

吳將李

異劉阿等踵躡先主軍屯駐南山八月乃收兵還巫

十月吳主聞先主位白帝甚惧遣使請和先主許之

遣大中大夫宗瑋報命

後主建興五年春丞相諸葛亮出屯漢中營沔北陽

平石馬三日下詔曰朕聞天地之道福仁而禍淫善

積者昌惡積者喪古今嘗數也是以湯武之修德而

王桀紂極暴而亡曩者漢祚中微網漏凶慝董卓造
難震蕩京畿曹操階禍竊執天衡殘剝海內懷無君
之心子丕孤豎敢尋亂階盜據神器更姓改物世濟
其凶當此之時皇極幽昧天下無主則我帝命隕越
于下昭烈皇帝體明睿之德光演文武應乾坤之運
出身平難經營四方人鬼同謀百姓與能兆民欣戴
奉順符讖建位易號丕承天序補弊興衰存復祖業
膺誕皇綱不墜於地萬國未靜早世遐殂朕以幼冲
繼統鴻基未習保傳之訓而嬰祖宗之重六合壅否
社稷不建永惟所以念在扶救光載前緒未有攸濟

朕甚懼焉是以夙興夜寐不敢自逸每崇菲薄以益
國用勸分務稽以阜民財受方任能以叅其聽斷私
降意以養將士欲奮劍長驅指討凶逆朱旗未舉而
丕復隕喪斯所謂不爇我薪而自焚也殘類餘醜又
支天禍恣睢河雒阻兵未弭諸葛亮丞相弘毅忠壯
忘身憂國先帝託以天下以勗朕躬今授之以旄鉞
之重付之以專命之權統領步騎二十萬眾董督元
戎龔行天罰除患寧亂克復舊都在此行也昔項籍
總一疆眾跨州兼土所務者大然卒敗垓下歿於東
城宗族如焚爲笑千載皆以不義陵上虐下故也今

賊效尤天人所怨奉時宜速廢馮炎精祖宗威靈相
助之福所何必克吳王孫權同恤災患潛軍合謀犄
角其後涼州諸國王各遣月支康居胡侯富康植等
二十餘人詣授節度大軍北出便欲率將兵馬奮戈
先驅天命既集人事又至師貞勢并必無敵矣夫王
者之兵有征無戰尊而且義莫敢抗也故鳴條之後
軍不血刃牧野之師商人倒戈今旄麾首路其所經
至亦不欲窮兵極武有能棄邪從正簞食壺漿以迎
王師者國有賞典封寵大小各有品限及魏之宗族
支葉中外有能規利害審逆順之數來詣降者皆原

除之昔輔果絕親於智氏而蒙全宗之福微子去殷
項伯歸漢皆受茅土之慶此前世之明驗也若其迷
沉不反將助亂人不式王命戮及妻孥罔有赦廣
宣恩威貸其元帥吊其殘民他如詔書律令丞相其
露布天下使稱朕意焉

六年春亮出攻祁山不克冬復出散關圍陳倉糧盡
退魏將王雙率軍追亮亮與戰破之斬雙還漢中
七年春亮遣陳式攻武都陰平遂克定二郡
八年征西大將軍魏延破魏雍州刺史郭淮於陽谿
九年三月亮復出軍圍祁山魏將司馬宣王張郃救

祁山六月亮糧盡退軍卻追至青封與亮交戰命被箭射死

延熙十二年秋衛將軍姜維攻魏雍州不克而還

十三年姜維復出西平不克而還

十六年四月姜維復率眾圍南安不克而還

十七年正月姜維還成都六月維三率眾出隴西冬

援狄道河間臨洮三縣民居于縣竹繁縣

十八年春姜維還成都夏姜維率諸軍出狄道與魏

雍州刺史王經戰于洮西大破之退保狄道城維却

住鍾題

十九年春姜維進位大將軍督戎馬與鎮西將軍胡

濟期會上邽濟失誓不至

二十年姜維率眾出駱谷至苦水

景耀五年姜維復率眾出侯和為鄧艾所破還住沓

中

吳大帝初為吳王

未封王以前交
侵事具勳業門

蜀先主帥軍來伐

蜀章武元年也至巫山秭歸使使乃道武陵蠻夷五溪民皆

反為蜀帝以陸遜為督督朱然潘章等以拒之

黃武元年

蜀章武二年也

正月陸遜部將軍宋謙等攻蜀五

屯皆破之斬其將蜀軍分據險地前後五十餘營遜

隨輕重以兵應拒自正月至閏月大破之臨陣所斬及投兵降首數萬人先王奔走僅以身免

九月魏乃命曹休張遼臧霸出洞口曹仁出濡須曹真夏侯尚張郃徐晃圍南郡大帝遣呂範等督五軍以舟軍拒休等諸葛瑾潘章楊粲救南郡朱恒以濡須督拒仁十一月大風範等溺歿者數千人軍還江南曹休使臧霸以輕船五百敢歿萬人襲攻徐陵燒攻城三殺略數百人將軍全琮徐盛追斬魏將尹盧殺獲數百

二年正月曹真分兵據江陵中州三月曹仁遣將軍

嘗彫等以兵五千乘油船晨渡濡須中州仁子泰因引軍急攻朱桓桓兵拒之遣將軍嚴圭等擊破彫等是月魏軍皆退

六月令將軍賀齊督麋芳劉邵等襲蘄春虜太守晋宗先是宗爲戲口守將殺其將王直以衆叛如魏魏以爲蘄春太守數犯邊境至是虜之

五年七月帝聞魏明帝初立征江夏圍石陽不克而還

七年五月鄱陽太守周魴僞叛誘魏將曹休八月帝至皖口使將軍陸遜督諸將大破休於石亭

黃龍三年夏中郎將孫布詐降以誘魏將王淩淩以軍迎布十月帝以大兵潛伏於阜陵俟之淩見而走嘉禾元年三月遣將軍周賀較尉裴潛乘海之遼東九月魏將田豫要擊斬賀於成山二年帝向合肥新城遣將軍全琮征六安皆不克還三年五月遣陸遜諸葛瑾等屯江夏沔口孫韶張承等向廣陵淮陽帝率大眾圍合肥新城是時蜀相諸葛亮出武功帝謂魏明帝不能遠出而明帝遣兵取司馬宣王拒亮自率水軍東征未至壽春遂還孫韶亦罷

六年十月遣衛將全琮襲六安不克
赤烏二年三月遣使者羊衞鄭胃將軍孫怡之遼東擊魏守將張持高慮等虜得男女
四年四月遣衛將軍全琮略淮南決芍陂燒安城即閤收其人民威北將軍諸葛恪攻六安琮與魏將王淩戰于芍陂中郎將秦晃等千餘人戰歿車騎將軍朱然圍樊大將軍諸葛瑾取柵中
六年春諸葛恪征六安破魏將謝順管收其人民是歲魏司馬宣王率軍入舒
九年二月車騎將軍朱然征魏柵中斬獲千餘

十年遣諸葛壹僞叛以誘諸葛誕誕以步騎一萬迎壹於高山大帝出涂中遂至高山潛軍以待之誕覺而還

十三年十二月魏大將軍王昶圍南郡荊州刺史王基攻西陵遣將軍戴烈陸凱往拒之皆引還

廢帝會稽王建興元年十二月魏使將軍諸葛誕胡遵等步騎七萬圍東興將軍王昶攻南郡毋丘儉向武昌甲寅太傅諸葛恪以大兵赴敵戊午兵及東興交戰大破魏軍殺將軍韓綜桓嘉等

二年三月諸葛恪率軍伐魏四月圍新城大疫兵卒

死者大半八月恪引軍還

五鳳二年正月魏鎮東將軍毋丘儉前將軍文欽以

淮南之衆西入戰于樂嘉

閏月壬辰丞相孫峻及驃騎將軍呂據左將軍留贊率兵襲壽春軍及東興聞欽等敗壬寅兵進于橐臯欽詣峻降淮南餘衆數萬口來奔魏諸葛誕入壽春峻引軍還

二月孫峻及魏將軍曹珍遇于高亭交戰珍敗績留贊爲誕別將蔣班所敗於菰陵贊及將軍孫楞蔣修等皆遇害

三月使鎮南將軍朱異襲安豐不克

太平元年二月孫峻用征北大將軍文欽計將征魏
八月先遣欽及驃騎呂據車騎劉纂鎮南朱異前將
軍唐咨軍自江都入淮泗

後主建衡元年十一月遣監軍虞汜威南將軍薛珣
蒼梧太守陶璜田荆州監軍李勗督軍徐存從建安
海道皆就合浦擊交趾

宋文帝元嘉元年後魏明元帝自率眾至方城遣鄭
兵將軍述奚斤兵將軍公孫表二萬人於滑臺司
州刺史毛德祖時成虎牢遣步騎三千拒之魏剋滑

臺并力乘勝遂至虎牢魏主自率大眾至鄴鄭兵既

克金墉還向虎牢又遣楚兵將軍涉歸東擊青州所

向城邑皆奔走明元自遣兵益虎牢增圍悉攻德祖

大敗魏主領楚兵諸軍自滑臺西就兵共攻虎牢虎

牢被圍二百日遂克虎牢武帝未受禪已前
事并入功業門

五年十月淮北鎮將軍王仲德遣步騎二千餘人侵

後魏濟陽陳留閏月又遣將王玄謨兗州刺史竺靈

秀步騎二千人攻滎陽將襲虎牢

七年三月遣右將軍到彥之統舟師入河諸軍各有
所向先遣殿中將軍由奇使魏言河南舊是宋土為

彼所侵今當修復舊境不關河北魏大武大怒謂奇
 曰我生頭髮未燥便聞河南是我家地爾豈可得若
 必進軍今權當歛戍相避須火行地淨河水冰合自
 更取之七月後將軍長沙王義欣出鎮彭城總統羣
 師彥之進軍魏碣礮及滑臺諸戍並棄城走以尹冲
 為司州刺史戊虎牢十一月魏眾南渡河彥之敗退
 洛陽滑臺虎牢諸城復為魏所陷尹冲歿之是歲魏
 神嘉三年也魏書云八月宋將到彥之自清水入河
 沂流西行帝以河南兵少詔攝四鎮乃
 治兵將西討丙寅到彥之遣將渡河攻治反叛彥之軍
 將軍安頡督諸軍破之斬首五百餘級投水歿者甚
 眾十月庚申到彥之王仲德治河置守還保東平乙
 亥冠軍安頡濟河攻洛陽丙子拔之擒宋將二十八

斬首五千級時河北諸軍會於七女津彥之恐軍南
 渡遣將王蟠龍沂流欲盜官船征南大將軍杜超等
 擊破斬之辛巳安頡虎牢宋司州刺史尹冲墜城歿
 甲午壽光侯叔孫建汝陰公長孫道生濟河到彥之
 王仲德從清入濟東走青州宋兗州刺史竺靈秀棄
 穎昌南奔湖陸戊戌叔孫建大破竺靈秀於湖陸殺
 獲五千餘人辛丑冠軍安頡率諸軍攻滑臺瑯琊王
 司馬楚之破宋將于長社四年正月丙申宋將檀道
 濟王仲德從清水救滑臺丹陽王叔孫汝陰公長孫
 道生拒之道濟等不敢進二月辛酉安頡司馬楚之
 平滑臺擒宋將朱循之李元德及東郡太守申謨二
 月宋將檀道濟王仲德東走諸將追之至歷城而還
 三月庚戌冠軍將軍安頡
 獻宋俘萬餘人甲兵三萬
 八年正月征南大將軍檀道濟破魏軍於東壽張二
 月滑臺為魏所陷道濟引軍還
 二十年二月仇池為索虜所沒

二十三年三月魏軍寇豫青冀刺史申恬破之
二十七年二月魏攻汝南諸郡陳穎二郡太守鄭琨
汝陽潁川二郡太守郭道隱委守走魏軍攻懸瓠城
行汝南郡事陳憲拒之七月遣寧朔將軍王玄謨北
伐太尉江夏王義恭出次彭城總統諸軍魏碯碯戍
委城走閏月癸亥玄謨攻滑臺不克爲魏軍所敗退
還碯碯辛未雍州刺史隨王誕遣軍攻弘農城克之
丙戌又克關城十一月戊子魏軍陷鄒山魯陽平二
郡太守崔邪利沒甲午隨王誕所遣軍又攻陝城克
之癸卯左軍將軍劉康祖於壽陽尉武戌與魏軍戰

敗見殺十二月戊午內外戒嚴乙丑冗從僕射胡崇
之太子積弩將軍臧澄之建威將軍毛熙祚于盱眙
與魏軍戰敗并見殺庚午魏主率大衆至瓜步
二十八年正月丁亥魏軍自瓜步退走丁酉攻圍盱
眙城是月寧朔將軍王玄謨自碯碯退還歷下二月
丙辰魏軍自盱眙奔走時南平王鐸爲豫州刺史遣
中兵參軍胡盛之出汝南上蔡向長社戍主魯爽棄
城奔走旣克長社遣幢主王陽兒張畧等進據小索
魏豫州刺史僕蘭於大索率步騎二千攻陽兒陽兒
擊大破之坦之等進向大索勞楊氏鄭德玄張和各

起義以應坦之僕蘭奔虎牢會王陽兒等至即據大索因何虎牢鑠又遣安蠻司馬劉康祖繼坦之魏永昌王宜勒仁庫貢救虎牢坦之敗走魏軍乘勝遙追於尉氏津逢康祖康祖戰敗見殺進脅壽陽因東過與魏主會於江上魏荊州刺史魯爽及弟秀等率部曲詣鑠歸順是時魏主雖不克懸瓠而虜略甚多與帝書云往索真珠璫恠不相與今所截截鬪可當幾許珠璫也彼徃日北通芮芮西結赫連蒙遜吐谷東連馮弘高麗凡此數國皆我滅之以此而觀彼豈能獨立我今北征先除有足之寇彼若不從命來秋

當復往取以彼無足不先致討諸方已定不復相釋我往之日彼作何方計為塹城以自守為築垣以自障也

二十九年六月撫軍將軍蕭思話率眾北伐十月癸亥司州刺史魯爽攻虎牢不拔退還

孝武帝大明元年二月魏軍侵兗州

明帝泰始三年二月魏軍侵汝陰太守張景遠擊破之八月以中領軍沈攸之南行兗州刺史率眾北討

是歲魏獻文皇興元年也魏紀云閏正月宋青州刺史沈文秀冀州刺史崔道固並遣使請舉州內屬詔平東將軍長孫陵平南將軍疾窮奇赴援之二月詔征南大將軍慕容白曜督

騎五萬次於碭礮為東道後援宋東平太守申纂戍無塩遏絕王使詔白曜討之三月文孝道固復叛歸宋白曜回帥討之拔宋肥城垣苗糜溝三戍四月白曜攻汴城八月攻歷城二年二月道固及宋梁鄒戍主平原太守劉林賓舉城降三月白曜進圍東陽

四年十月發諸軍州兵北伐

五年正月乙丑魏克青州執刺史沈文秀以歸

七年十月遣將垣崇祖率眾二萬自郁州侵魏東兗

州屯于南城為刺史于維侯所敗崇祖還郁州

後廢帝元徽二年七月遣將侵魏緣淮諸鎮為魏徐

州刺史尉元擊敗之

順帝昇明元年十月葭蘆戍主楊文度遣弟鼠襲陷

魏仇池

七月又遣將伐魏仇池為魏陰平太守楊廣香所擊走之

南齊高帝建元二年正月魏軍侵淮泗遣眾軍北伐

內外戒嚴二月魏軍侵壽陽豫州刺史垣崇祖破走

之是月西境獻捷解嚴是歲魏孝文太和四年也魏紀

云齊徐州刺史崔文仲寇淮北陷莊眉戍二月遣尚書游明根率二千騎南討八月梁州刺史崔惠景遣長史裴叔寶率眾寇武興關城氏帥楊鼠擊破之叔寶還南鄭莊音士笛反

三年正月領軍將軍李安民左將軍徐文顯與魏軍

戰於淮陽大敗之初魏軍至緣淮驅略江北居民驚

走不可禁乃於梁山置二軍南置三軍慈姥置一軍

涿州置一軍三山置二軍白沙州置一軍蔡州置五

軍自慈姥以下皆江南地名屬今昇州長蘆置三軍疏浦置二軍徐浦

置一軍長蘆已下州涿屬揚州魏昌黎王馮莎向司州荒人栢

天生說莎云諸蠻皆響應莎至蠻竟不動莎大怒於

淮邊獵而去魏紀云南征諸軍擊破齊游擊將軍桓康於淮陽齊豫州刺史崇祖寇下蔡昌

黎王馮熙擊破之假寧郡王嘉大破齊軍俘獲三萬餘口

武帝永明六年四月遣將陳顯達攻陷醴陽魏左僕

射長樂王穆亮率騎一萬討之

一年七月魏軍侵邊遣江州刺史李顯達鎮雍州

樊城

明帝建武二年正月魏軍攻豫司徐梁四州遣鎮南

將軍王廣之督司州征討右衛將軍蕭坦之督徐州

征討尚書右僕射沈文秀督豫州征討二月魏軍攻

鍾離徐州刺史蕭惠休破之詔太尉陳顯達使持節

都督西北征討諸軍事內外戒嚴三月司州刺史

誕與眾軍擊魏魏軍破之自壽春退走是月解嚴四

月魏軍圍漢中梁州刺史蕭懿拒退之是歲魏太和

十九年也魏紀云大和十八年十二月車駕南征至

懸瓠十九年正月講武於汝水之西二月

巡淮而東至鍾離是月班師

丹于元龜 閏位部

卷之三百一十七

三年四月魏軍侵司州戍兵擊破之

四年魏侵沔北十月又侵司州遣太子中庶子梁王

右軍司馬張稷討之

是歲魏太和二十一年魏書事備帝王親征門

十二月

丁丑遣度支尚書崔慧景率眾救雍州

永泰元年正月沔北諸郡為魏所侵相繼敗沒遣太

尉陳顯達持節救雍州二月遣左衛將軍蕭惠休假

節援壽陽豫州刺史裴叔業擊魏軍於淮北破之

東昏侯永元二年正月詔討豫州刺史裴叔業

時頓誅大

臣叔業俱而降魏

以衛尉蕭懿為豫州刺史征壽春叔業病

歿兄子積以壽春降魏三月遣平西將軍崔惠景率

眾軍伐壽春

魏書云宣武景明元年二月南齊豫州刺史裴叔業以壽春內屬二月齊將胡

松李居士率眾萬餘屯宛陳伯之水軍沂淮而上以逼壽春四月彭城王勰車騎將軍王肅大破之斬首

萬數七月齊又遣陳伯之寇淮南八月彭城王勰破伯之於肥口

梁高祖天監元年五月魏揚州小峴戍主黨法宗襲

破大峴戍

二年八月魏將元興攻義陽陷寇軍將軍蔡靈恩等

十餘將

三年二月魏陷梁州八月陷司州是歲魏宣武正始

元年也

魏紀云正始元年一月梁將姜慶真襲陷壽春外郭州軍擊走之閏十二月梁行梁州事

夏侯道遷據漢中來降假尚書邢巒鎮西將軍率眾以赴之二年四月巒遣統軍王足西伐頓破梁軍遂

入劔關六月梁將李暉等置營始平郡東涪水之北
王足逆擊敗之梁將魯方達攻竹亭足又破之方達
屯茂新城足又遣統軍盧祖遷等擊敗之七月足又
逼涪城梁巴西大守庚域統軍主李吹等逆戰足擊
破之八月詔中山王英南討襄沔十一月足圍
涪城益州諸郡戍降者十二三遂引軍而退

四年十月大舉侵魏以中書將軍揚州刺史臨州王
宏都督北討諸軍事尚書右僕射柳惔為副

五年二月輔國將軍劉思效破魏青州刺史元擊於
膠水是月魏將陳伯之自壽陽率眾歸降五月太子

左衛率張惠之克魏宿預城臨川王宏前軍克梁城
豫州刺史常叡克合肥城廬江太守裴邃克羊石城

又克霍丘城六月青龍二州刺史桓和前軍克駒山

城十一月魏軍寇鍾離遣右將軍曹景宗率眾赴援

魏書云宣武王正始二年正月梁黃州刺史桓和入
寇南青州軍擊走之十一月平南將軍陳伯之破梁徐
州刺史昌義之於梁城是月梁將蕭暉率眾五萬寇
淮陽以中山王英為征南將軍都督楊佺二道諸軍
事指授邊將五月梁張惠紹入寇宿豫蕭容陷梁
城常叡陷合肥城又陷羊石霍丘二城六月又陷小
岷戊是月假平南將軍一軍奚康生破梁將張惠紹其
徐州刺史宋黑詔發一軍安樂王詮督後發諸軍以赴
濟南軍又詔平南將軍一軍破梁軍於淮南梁中軍大將
軍臨川王蕭宏尚書右僕射柳惔徐州刺史昌義之
等率梁城涇淮東走追奔於馬頭梁冠軍將軍戊
王朱思遠棄城宵遁擒送梁四千餘人斬獲士卒五萬有
餘英遂攻鍾離

六年四月曹景宗常叡等破魏軍於邵陽洲斬數萬計
魏書云鍾離大水中山王英敗績而還

七年十月詔大舉北

伐以護軍將軍始興王憺為平

北將軍率眾入清車

騎將軍王懋率眾向宿豫是月

魏懸瓠鎮軍主白卓

生魏書云豫州白早生豫州刺史胡遜以

城內屬是歲魏永平

元年也魏書云豫州城人白卓生移刺史司馬悅據城

南梁遣將齊苟仁

等四將以助之詔尚書郎邢巒

行豫州事督將軍崔

暹率騎討之是月邢巒大破卓

生及苟仁軍於魚口

十二月又克懸瓠斬白卓生

擒齊苟仁等俘梁卒

二千餘人分賜王公已下

八年正月魏鎮東參

軍成景雋斬宿豫城主嚴仲寶

以城內屬

魏書云正月梁遣王神念寇南兖詔輔國

軍以討之

將軍長孫稚假平南將軍為都督率統軍

魏軍追振遠將軍馬仙理討之是月魏徐州刺史率

眾赴朐山十二月仙理大破魏軍斬馘十萬餘復克

朐山城

魏書云四月梁遣其鎮北將軍張穆及馬仙

陷和太

瑀寇朐山詔盧昶率兵赴之十一月朐山城

十四年魏降人王足陳計求堰淮水以灌壽陽帝率

徐陽人二十萬戶取五丁以築之四月堰將合淮水

漂疾復決潰

魏書云三月梁於浮山堰淮規為揚徐

刺史蕭寶寅為鎮東將軍央淮

堰寶寅東昏侯弟也歸于魏也

九月遣將趙祖悅襲據硤石

十五年二月硤石為魏鎮南將軍崔亮鎮軍大將軍

李平所克

五月衡州刺史張齊侵益州為魏將傅賢眼所敗是魏孝明熙平元年也

普通二年六月茂州刺史文僧明以州叛入於魏假大將軍裴邃節督眾軍北討

五年六月以員外散騎嘗侍元樹為平北將軍北青冀二州刺史率眾北伐八月徐州刺史戎景雋克魏

童城九月又克睢陵城北兗州刺史趙景悅圍荆山宣毅將軍裴邃襲壽陽入羅城弗克十月樹邃攻建

陵城破之樹又破曲木掃虜將軍彭寶孫克瑯琊父克檀丘城邃破狄又克樊城遂進屯黎時定遠將軍

曹世宗破曲城又克秦墟魏鄆潘溪守悉棄城走東海太守韋敬欣以司吾城降十一月寶孫克東莞城

邃攻壽陽之安城克之馬頭安城竝來降十二月荆山城降武勇將軍李國興攻平靜關克之信威長史

陽法乾攻武陽關又攻峴關竝克之

六年正月雍州前軍克新蔡郡又克鄭城二月趙景悅下龍亢城五月遣中護軍夏侯亶督壽陽諸軍北

伐六月豫章王綜奔于魏魏復據彭城

七年十一月夏侯亶胡龍牙元樹曹世宗等衆軍克

壽陽城

大通元年正月司州刺史夏侯懿進軍三關所至皆克五月成景儁克魏臨潼竹邑十月魏東豫州刺史元慶和以渦陽內屬

十一月以中護軍蕭深藻為北討都督征北大將軍鎮渦陽

二年四月魏郢州刺史元願達以義陽內附時魏大亂其北海王元顥汝南王元悅竝來降十一月以元顥為魏主以東宮直閣將軍陳慶之衛送還北

中大通元年四月陳慶之攻魏梁城拔之進屠考城

擒濟陰王元暉業五月克大梁又克虎牢城魏莊帝

棄雒陽走河北元顥遂入洛陽尋為爾朱榮所殺

二年六月遣魏汝南王元悅還北為魏主以魏尚書

右僕射范遵為安北將軍司州牧隨元悅北討

大同元年十月北梁州刺史蘭欽攻魏漢中克之

二年十月乙亥詔大舉北伐十一月班師是歲東魏

天平二年也

太清元年二月魏司徒侯景求以豫廣穎雒陽西揚東荆北荆襄東豫南交西交齊等十三州內屬三月追司州刺史楊鴉仁交州刺史桓和仁州刺史湛海

珍等應接北豫六月以鄱陽王範為征北將軍總督
 漢北征討諸軍七月鴉仁入懸瓠城八月王師北伐
 以南豫州刺史蕭深明為大都督十一月魏遣大將
 軍慕容紹宗等至寒山丙午大戰貞陽侯深明敗績
 及北兖州刺史胡貴孫等竝陷魏紹宗進圍潼州
 二年正月魏陷渦陽
 簡文大寶二年五月魏遣大師潘維辛等寇秦郡王
 僧辯遣杜崩帥眾拒之

孝元帝承聖二年正月西魏遣大將軍尉遲迥襲益
 州五月進逼巴西潼州刺史楊虔運以城降迥六月
 迥圍陷益州九月西魏遣郭元建治舟師於合肥又
 遣大將軍杲遠步六年薩東方老成率眾會之

四年三月北齊遣其上黨王高渙送貞陽侯蕭深明
 來主梁嗣至東關遣吳興太守裴之橫與戰敗績之
 橫歿太尉王僧辯率眾出屯姑孰

敬帝太平元年三月齊遣大將蕭軌出柵口向梁山
 司空陳霸先軍主黃叢音柳逆擊大破之軌退保蕪湖
 遣周文育侯安都率眾據梁山拒之四月侯安都輕
 兵襲齊行臺司恭於歷陽大破之五月庚寅齊軍水
 步入丹陽縣景申至秣陵故治勅周文育還頓方正

徐度頓馬牧杜陵頓大衍癸卯齊軍進據兒塘輿駕
出頓趙建故籬門內外戒嚴六月甲辰齊潛軍至蔣
山龍尾斜趨莫府山北至玄武湖西北乙卯司空陳
霸先授衆軍節度與齊軍交戰大破之斬齊北兗州
刺史杜方慶及徐嗣徽弟嗣宗生擒徐嗣產蕭軌東
方老王敬寶李希光裴英超劉歸義等皆誅之辛酉
解嚴

二年二月庚午遣領軍將軍徐度入東關戊子至合
肥燒齊船三千艘

後梁明帝天保五年陳湘州刺史華皎邕州刺史戴
僧朔來附皎送其子玄響爲質於梁仍率諸軍伐陳
明帝上言其狀周高祖詔衛公直督荊州總管權景
宣大將軍元定等赴之明帝亦遣其柱國王操率水
軍二萬會皎於巴陵旣而與陳將吳明徹等戰沌口
直軍不利元定遂沒梁大將軍李廣等亦爲陳人所
虜長沙巴陵竝陷於陳衛公直乃歸罪梁之柱國殷
亮明帝雖以退敗不獨在亮然不敢違命遂誅之吳
明徹乘勝攻克梁河東郡獲其守將許孝敬明徹進
寇江陵引江水灌城明帝出頓紀南以避其銳江陵
副總管高琳與其尚書僕射王操拒守梁軍主馬武

吉維等擊明徹退保公安明帝乃還江陵明帝之八年陳又遣其司空章昭達寇江陵總管陸騰及梁之將士擊走之昭達又寇竟陵之青泥明帝令其大將軍許世武赴援大為昭達所破初華皎戴僧朔從衛公直與陳人戰敗率其麾下數百人歸於明帝明帝以皎為司空封江夏郡公以僧朔為車騎將軍封吳興縣侯明帝之十年皎將來朝至襄陽請衛公直曰梁主既失江南諸郡民少國貧朝廷興亡繼絕理宜資贍豈使齊桓楚莊獨擅救衛復陳之美望借數州以俾梁國直然之乃遣使言狀周高祖許之詔以基

平都三州歸之於梁

陳高祖永定二年二月詔車騎將軍司空侯瑱總督水步軍以遏齊寇

文帝天嘉元年周將賀若敦獨孤盛等來攻巴湘以司空侯瑱為西討都督大敗盛軍將餘眾自揚乘洲潛遁二年七月敦自拔遁歸人畜歿者十七八宣帝大建五年三月分命眾軍北伐以鎮西將軍開府儀同三司吳明徹都督諸軍事

四月癸卯前巴州刺史魯廣達克齊大峴城辛亥吳明徹克秦州水柵與申齊兵十萬援歷陽儀同黃法

蕤破之辛酉齊軍救秦州吳明徹又破之甲子南譙太守徐擗克石梁城

五月乙巳瓦梁城降癸酉陽平郡城降甲戌徐擗克盧江郡城景子黃法蕤克歷陽城己卯北高塘郡城

降景戌廬陵內史任忠軍次東關克其東西二城進克蕪城戊子又克譙郡城秦州城降癸巳瓜步胡野

以城降
六月庚子鄭州刺史李綜克瀟口城乙巳任忠克合

州外城庚戌淮陽沭陽郡竝棄城走癸丑豫章內史程文季克經州城乙卯宣毅司馬湛施克新蔡城癸

卯黃法蕤克合州城吳明徹師次仁州甲子克其州

城

七月戊辰齊遣衆二萬援高昌西陽太守周某名犯太宗

廟破之己巳吳明徹軍次峽口克其北岸城南岸守者棄城走周某克巴州城淮北絳城及穀陽士民竝

誅其渠帥以城降庚戌吳明徹克壽陽外城

八月乙未山陽城降壬寅盱眙城降壬子戎昭將軍徐敬辯克海安城青州東海城降壬申高唐太守沈

善度克馬頭城甲戌齊安城降丙子左衛將軍樊毅克廣陵楚子城丁亥前鄱陽內史魯天念克黃城小

城齊軍退保大城壬辰黃城大城降

十月甲午郭默城降乙巳吳明徹克壽陽城丁未齊兵萬人至頽口樊毅擊走之辛亥齊遣兵援蒼陵又破之戊午湛陁克齊昌城

十一月淮陽城降庚辰威虜將軍劉桃根克胸山城辛巳樊毅克濟陰城己丑魯廣達等克北徐州壬午任忠克霍州城

六年正月甲申廣陵金城降

七年正月乙亥左衛將軍樊毅克潼州城

二月戊申樊毅克下邳高山等六城

閏九月都督吳明徹大破齊軍於呂梁

九年十月戊午司空吳明徹破周將梁士彥衆數萬

于呂梁

十年二月甲子北討衆軍敗績於呂梁司空吳明徹及將卒以下竝爲周軍所獲

十一年十一月周遣柱國梁士彥率衆至肥口戊戌周軍進圍壽陽辛丑前豐州刺史鞏文奏率步騎三千趣陽平郡癸卯任忠率步騎七千趣秦郡景午新除仁威將軍右衛將軍魯廣達遣卒衆入淮是日樊毅領水軍二萬自東開入焦湖武毅將軍蕭摩訶率

步騎趣歷陽戊申豫州陷辛亥霍州又陷

十二月乙丑南北交晉三州及盱眙軍山陽蕩平馬

頭秦歷陽沛北譙南梁等九州竝自拔還京師譙北

徐州又陷自是淮南之地盡沒於周矣

十二年八月庚申詔鎮西將軍樊毅進督沔漢諸軍

事遣平南將軍南豫州刺史任忠率眾趣歷陽通直

散騎嘗待超武將軍陳慧紀為前軍都督趣南兖州

庚午通直散騎嘗待淳于陵克臨江郢癸酉智武將

軍魯廣達克郭默城景子淳于陵克祐州城

九月丁亥周將王延貴率眾援歷陽任忠擊破之生

擒延貴等

東魏孝靜帝大平二年二月梁司州刺史陳慶之寇

豫州刺史堯雄擊走之六月梁魏王元慶和寇南頓

堯雄大破之十月梁將抑仲禮寇荊州刺史王元擊

破之

三年九月以定州刺史侯景兼尚書右僕射南道行

臺節度諸軍南討十一月景攻克梁楚州獲刺史桓

和是歲與梁通好

四年十月西魏行臺宮景壽都指揮楊白駒寇雒州

大都督韓賢大破之西魏又遣其子大行臺元季海

大都督獨孤信逼雒州刺史廣陽王湛棄城歸關季海信遂據金墉

元象元年八月大破西魏之衆于河陰

武定五年九月梁武遣貞陽侯蕭明寇徐州堰泗水於寒山灌彭城以應侯景十一月以尚書左僕射慕容紹宗爲東南道行臺與大都督高岳潘相樂大破擒之及其二子瑀遁十二月蕭明至關帝御閭闔門讓而宥之岳等廻師討侯景

六年四月太尉高岳司徒韓軌大都督劉豐等討西魏王思政於潁川引洧水灌其城

七年五月大將軍高澄帥師赴潁川六月克之獲大將軍王思政等

北齊文宣天保元年十一月周文帝率衆至陝城分騎北渡至建州帝親戎出次城東周文帝聞帝軍容嚴盛嘆曰高歡不灰矣遂退師

二年五月景戌合朔州刺史斛斯顯攻克梁歷陽鎮七月癸酉行營邢景遠破梁龍安戍獲鎮城李雒文三年三月以司州牧清河王岳爲使持節西道大都督司徒潘相樂爲使持節東道大都督及行臺辛術率衆南伐

六年正月壬寅清河王以衆軍渡江克夏首二月甲戌上黨王渙克譙郡

三月景戌上黨王渙克東關斬梁將梁之橫俘斬數千

七年三月丁酉大都督蕭軌等率衆濟江六月乙卯蕭軌等與梁師戰于鍾山之西遇霖雨失利軌及都督李希况王敬寶東方老軍司裴英起竝沒士卒散還者十二三

武城河清二年十二月巳酉周將楊忠率突厥阿史那木可汗等二十餘萬人自鎮州分爲三道殺掠東人已未周軍逼并州又遣大將軍達奚武帥衆數萬東雍及晉州與突厥相應

三年正月周軍至城下而陳戰於城南周軍及突厥大敗入馬歿者相枕數百里不絕

七月周軍三道竝出使其將尉遲迥寇雒陽楊標入軹關權景宣趣懸瓠

十一月甲午周將尉遲迥等圍雒陽甲辰太尉婁叡大破周軍於軹關擒楊標

十二月豫州刺史王士良以城降周將權景宣壬戌太師段韶大破尉遲迥等解雒陽圍

梁太祖開平二年四月甲寅淮寇侵軹潭岳邊境欲
援朗州以戰艦百餘艘揚航西上泊峒口湖南馬殷
遣水軍都將黃瑀率樓船遮擊之賊衆沿流宵遁追
至鹿角鎮

五月丁丑王師圍潞州將及二年李進通窮危旦夕
不俟攻擊當自降太原李存勗以厚幣誘結北蕃諸
部竝其境內丁壯悉驅南征決戰以救上黨之惡部
落帳族馳馬甲兵數路齊進於銅鞮樹寨旗壘相望
是月癸未淮賊寇荊州石首縣襄陽舉舟師沿澆港
襲敗之

六月丙辰邠岐來寇雍西編戶因于逃避且芟害禾
稼結營自固踰月同州劉知俊領所部兵擊退襲至
幕谷大破之俘斬千計收其生噐甲宋文通僅以身
免

是月壬戌岳州爲淮賊所據帝以北郡五領三湘水
陸會合之地委輸商賈靡不繇斯遂令荆湘湖南北
舉舟師同方致討王師集淮夷毀壁焚鄢郭而遁
十月巳亥上在陝兩浙節度使奏於嘗州東州鎮殺
淮賊萬餘人獲戰船一百二隻

末帝乾元三年五月乙巳天雄軍節度使楊師厚及

劉守奇率魏博邢洛徐兗鄆滑之衆十萬討鎮州庚戌營於鎮之南門外壬子晉將史達瑋自趙州領騎五百人入於鎮州師厚知其有備自九月移軍於下博劉守奇以一軍自貝州掠冀州衡水阜城陷下博師厚自弓高渡御河迫滄州張萬進懼送款于師厚師厚表請以萬進爲青州節度使以劉守奇爲滄州節度使

七月晉王率師自黃澤嶺東下寇邢洛魏博節度使楊師厚軍於漳水之東晉將曹進金來奔晉軍遂退貞明元年四月邠州留後李保衡以城歸順是月鳳

翔李茂貞遣僞署涇州節度使劉知俊率師攻邠州以李保衡歸順故也自是凡攻圍十四日節度使霍彥威諸軍都指揮使黃貴堅等捍寇會救軍至岐人乃還

六月庚寅晉王入魏州以賀德倫爲大同軍節度使舉族遷於晉陽是月晉人陷德州秋七月又陷澶州刺史王彥章棄城來奔是月劉鄩自涇水潛師繇黃澤路西趣晉陽至樂平縣值霖雨積旬乃班師還次宗城遂至貝州軍於堂邑遇晉軍轉戰數十里晉軍稍還

二年二月命許州節度使王檀河陽節度使謝彥章鄭州防禦使王彥章率師自陰地關抵晉陽悉攻其壘不克而旋

三月劉鄩率師與晉王大戰於元城鄩軍敗績先是鄩軍駐於莘帝以河朔危急師老於外餉饋不克遣使賜鄩詔微以責讓鄩奏以寇勢方盛未可輕動帝又問鄩決勝之策鄩奏曰人給糧十斛盡則破敵帝不悅復遣促戰鄩召諸將會議諸將皆欲戰鄩默然一日鄩引軍攻鎮定之營彼衆大駭上下騰亂俘斬甚衆時帝遣偏將楊延直領軍萬餘人屯檀州以應

鄩既而晉王詐言歸大原劉鄩以爲信是月詔楊延直會於魏城下鄩自莘率軍亦至與延直會既而晉王自貝州至鄩引軍漸退至故元城西與晉人決戰大爲所敗追至河上軍士赴水歿者甚衆鄩自黎陽濟河奔滑州

四年二月遣將謝彥章帥衆數百追楊劉城甲子晉王來援楊劉彥之軍不利而退
八月晉王率師次楊劉口遂軍於麻家渡北面招討使賀瓌以兵屯濮州北行臺村對壘百餘日晉王以輕騎來覘許州節度使謝彥章發伏兵掩擊圍之數

重會救軍至僅以身免

十二月庚子朔晉王領軍追行臺寨十里距碁結營而止二十二日晉王次臨濮賀瓌王彥章自行臺寨軍躡之二十四日至胡柳陂晉王領軍出戰瓌軍已成列晉王以騎突之王彥章一軍先敗彥章走濮陽晉人輜重在陳西瓌之領軍薄之晉人大奔自相陷籍歿者不可勝計晉大將軍周德威歿於陣瓌軍登七山列陣於山之下晉王復領軍來戰瓌軍遂敗翼日晉人攻濮陽陷之京師戒嚴

五年春正月晉人城德勝夾河爲柵

四月賀瓌攻德勝南城以艤艦戰艦橫於河以扼津濟之路晉人斷其艤艦濟軍以援南城瓌等退軍十二月戊戌晉王領軍追河南寨王瓚率師禦之獲晉將石家才既而瓚軍不利瓚退保楊村寨

六年六月遣兗州節度使溫昭圖莊宅使段凝領軍攻同州先是河中朱友謙襲陷同州節度使程全暉單騎奔京師友謙以其子令德爲同州留後表求節旄不允既而帝慮友謙怨望遂命兼鎮同州制命將下而友謙已叛遣使求援於晉故命將討之九月庚寅以供奉官郎公遠克契川歡好使晉王遣都將李

嗣昭李存審王建及率師來援同州戰於城下我師
敗績諸將以餘眾退保華州

龍德元年春正月戴思遠率師襲魏州時晉方攻鎮
州故思遠乘虛以襲之陷城安而還遂急攻德勝北
城晉將李存審極力拒守

二月晉王以兵至思遠收軍而退復保楊村

八月段凝張朗攻衛州下之獲刺史李存儒以獻戴
思遠又下淇門共城新鄉等三縣自是澶州之西湘
州之南皆為梁有晉人失軍儲三分之一焉

三年五月以滑州節度使王彥章為北面行營招討

使辛酉王彥章率舟師自村寨浮河而下斷德勝之

浮梁攻南城下之殺數千人唐帝棄德勝之北城併

軍保楊劉已巳王彥章圍楊劉城

六月乙亥唐帝引軍援楊劉潛軍至博州築壘於河

東岸戊子王彥章杜晏球率兵悉攻博州之新壘不

克遂退保于鄒口

七月丁未唐帝引軍沿河而南王彥章棄鄒口復至

楊劉已未自楊劉援營退保楊村寨

八月以段凝代王彥章為北面行營招討使戊子段

凝營於王村引軍自高陵渡河略臨河而還薰璋攻

州府元龜 交侵

澤州下之庚寅命滑州節度使王彥章率兵屯守鄆之東境九月戊辰彥章以衆渡汝與唐軍於遮坊鎮章軍不利退保中都

冊府元龜

淮南李嗣京參閱

西極文翔鳳訂正

豫章黃國琦較釋

閏位部 三十七

失政 疑忌 惡直

夫布嘗無藝亂政亟行用茲為國何以永世自秦嬴宰制事或非允吳蜀分據政則殊俗宋齊相襲梁陳繼軌至於出令制命不厭於衆心阿諛近習匪率乎

冊府元龜 閏位部 卷之三十一 十八

變則賞罰淆亂賢愚混同典禮無章用度靡紀而猶
驕心方熾白謂永圖逮於高齊咸有斯弊今取其梗
槩著之于編云

秦始皇二十六年丞相綰等言諸侯初破燕齊荆地
遠不為置王毋以填之填音竹請立諸子唯上幸許

始皇下其議於群臣群臣皆以為便廷尉李斯議曰
周文王所封子弟同姓甚衆然后屬疏遠相攻擊如
仇讐諸侯更相誅伐周天子弗能禁止今海內賴陛
下神靈一統皆為郡縣諸子功臣以公賦稅重賞賜
之甚足易制天下無異意則安寧之術也置諸侯不

便始皇曰天下共苦戰鬪不休以有侯王賴宗廟天
下初定又復立國是樹兵也而求其寧息豈不難哉

廷尉議是分天下為三十六郡三；六郡謂河南上

南郡九江鄣郡會稽潁川碭郡泗水一郡東郡琅邪

齊上谷漁陽右北平遼西遼東代郡會鹿郡鄆上黨

平原雲中太原鴈門上郡郡置守尉監秦郡守掌治

隴西北平中巴郡蜀郡更名民曰黔首黔亦黎三十四年

丞相李斯言古者天下散亂莫相一是以諸侯竝作
語皆道古以害今飾虛言以亂實人善其所私學以
非上所建立今皇帝竝有天下辨白黑而定一尊私
學相與非法教人制聞令下即各以其學議之入則

心非出則巷議非主以為名異趨以為高率群下以造謗如此不禁則主勢降乎上黨與成乎下禁之便臣請諸有文學詩書百家語者蠲除去之令到滿三十日弗去黥為城旦所不去者醫藥卜筮種樹之書若有欲學者以吏為師始皇可其議收去詩書百家之語以愚百姓使天下無以古非今

蜀後主卽位未踰月而改元者緣臣子心不忍一年而有二君也今可謂亟而不知禮矣又國不置史注記無官是以行事多遺災異靡書景曜元年宦人黃皓始專國政

吳大帝嘉禾中信任較事呂壹壹性苛慘用法深刻太子登數諫帝不納大臣繇是莫敢言

景帝永安中以丞相濮陽典及佐將軍張布有舊恩委之以事布典宮省典關軍國帝欲與祭酒韋曜博士盛冲講論道藝曜冲素皆切直布恐入侍發其陰失因妄飾說以拒遏之帝初為王時布為左右將督素見信愛及至踐祚厚加寵待專擅國勢多行無禮自嫌瑕短懼曜冲言之故尤患忌帝雖解此一日心不能悅更恐其疑懼竟如布意廢其講業復使冲等

人

後主寶鼎中更營新宮制度弘廣飾以珠玉所費甚多是時盛夏興功農守竝廢天紀中岑昏險謏貴幸致位九列好興工役衆所患苦以上下離心莫爲后主盡力蓋積惡已極不復堪命故也

宋前廢帝卽位凶悖日甚誅殺相繼百司不保首領元凱以下皆被毆播牽曳內外危懼殿省騷然

明帝好鬼神多忌諱言語文書有禍敗凶喪疑似之言應迴避者犯卽加戮以南苑借張永云且給參百年期盡更請阮佃夫楊運長王道隆皆擅威權言爲詔勅郡守令長一缺十除內外混然官以賄命王阮

家富於公家及泰始泰豫之際左右失言往往有劊割繼戮禁中慄慄若踐刀劍軍旅不息府藏空虛百官竝繼祿俸在朝皆市井傭販之子每所造制必爲正御三十副御三十須一物輒造九十枚天下騷然民不堪命

南齊鬱林王卽位極意賞賜動百數十萬每見錢曰昔時思汝一個不得今日將用汝末期年之間世祖齊庫儲錢數億番盡

東昏侯永元二年八月後宮遭火之後更起仙華神佛玉壽諸殿刻畫雕彩青葩金口帶麝香塗壁錦幔

取諸寺佛刹殿藻非仙人綺獸以充足之世祖與仙樓上施青漆世謂之青樓帝曰武帝不巧何不純用琉璃是歲十二月梁武起兵於襄陽三年正月丙申朔日有食之時加寅漏上八刻率官人於闕武堂元會皇后正位闕人行儀帝戎服臨視自永元己後魏每來伐繼以內難揚州南徐州人丁三人取兩以此為率遠郡悉令上米一人五十斛輸米既畢就役如故又東境苦役多注籍詐病或以積年皆攝充役又追責病者租布隨其年歲多少御命之人皆給貨賂

隨意縱捨又橫調徵求梁武兵至與御刀右左及六官於華光殿立軍壘以金土為鎧仗親自臨陣詐被鎗勢以板榻將去以此馱勝又臺城外有伏兵乃燒城傍諸府署六門之內皆盡城中閣道西掖門內相聚為市販歿牛馬肉猶惜金錢不肯賞賜茹法珍叩頭請之帝曰賊來獨取我耶何為就我來求物後堂儲數百具榜啓為城防帝云擬作殿境不與城防巧手悉令作殿晝夜不休
梁武帝末年委事群倖中領軍朱异之徒作福作威挾朋樹黨政以賄成服冕乘軒申其掌握是以朝綱

混亂賞罰無章小人道長抑此之謂也初侯景謀反合州刺史鄱陽王王範司州刺史羊鴉仁竝累有啓聞朱异以景孤立寄命必不應爾乃謂使者曰鄱陽王遂不許國家有一客竝抑而不奏故朝廷不爲之備及寇至城文武咸尤之异慙忿而卒高祖借之方議贈事左右有善异者乃啓曰异忝歷雖多然平生所懷願得執法高祖因其宿志贈其侍中尚書右僕射

陳後主嗣位荒於酒色不恤刑政左右嬖佞珥貂者五十人婦人美貌麗服巧態以從者千餘人帝日酣飲從夕達旦以此爲嘗而盛修宮室無時休止稅江稅市徵取百端形罰酷濫牢獄嘗蒲諸軍臨江後主曰王氣在此齊兵三來周兵再至無不堆没今必自敗其臣孔範亦言無渡江理但奏妓縱酒作詩不輟北齊後主時韓鳳爲侍中領軍總知內省機密祖班曾與鳳於後主前論事班與鳳云強弓長矛無容相謝軍國謀策何繇得爭鳳答云各出意豈在文武優劣封昌黎王息寶仁尚公主在晉陽賜第一區其公主生男蒲月駕幸鳳宅宴會盡日每日一叅先被勅喚顧訪出後方引奏事官若不視事內省外頭急速

者附奏聞軍國要密無不經手東西巡及山水遊戲射獵多獨在御傍與高阿那肱穆提婆共處衡軸號曰三費損國害政日日滋甚天統中毀東宮造修文偃武隆基嬪嬙院起玳瑁樓又於遊豫園穿池周以列館中起三山構臺以象滄海竝伏修佛寺勞役鉅萬計財用不給乃減朝士之祿斷諸曹糧膳及九州軍人嘗賜併之

是時有穆提婆母陸令萱後主乳保也提婆本姓駱父超以謀叛伏誅令萱沒入掖廷後主襁褓之中令其鞠養謂之乾阿奶遂大爲胡后所昵愛令萱奸巧多機辨取媚百端宮掖之中獨擅威福後王紹位又後媚穆昭儀養之爲母是以提婆改姓穆氏及穆后立令萱號曰太姬此卽齊朝皇后母氏之位號也視第一品班在長公主之上自武平之後令萱母子勢傾內外矣庸劣之徒皆重跡屏氣焉自外殺生子奪不可盡焉

疑忌

夫觀感而化道乃大明小信未孚民猶弗與况乎忌克爲量包藏在心片言或讐則寘之城府危機一發則酷於荼毒以此與物難以濟矣若夫晉文之誓白

水嫌吝以安世祖之推赤心反仄乃定是知至誠能化疑事無功以餘閭之小邦挾猜恐之凶德民之無援亡於何有雖苟無患不其隘哉

孫策既定江東時有高岱隱於餘姚策命出使會稽丞陸昭逆之策虛已而候焉聞其善左傳乃自玩讀欲學其論講或謂之曰高岱以將軍英武而已無文學之才若與論傳而或云不知者則其言符矣又謂岱曰孫將軍為人惡勝已者若每問當言不知乃合意耳如皆辨義此必危殆岱以為然及與論傳或答不知然果怒以為輕已乃囚之知友及時人皆露坐

為請築登樓望見數里中瑱滿策惡其收眾心遂殺之

大帝初以禮聘沈友友至論王霸之略當時之務帝歛容敬焉陳荊州宜併之計納之友正色立朝清議峻厲為庸臣所譖誣以謀反帝亦以終不為已用大帝大會官寮云友有所是非令人扶出謂曰人言卿欲反友知不得脫乃曰主上在許有無君之心者可謂非反乎遂殺之

後主使徐紹使魏行至濡須召還殺之徙其家屬建安始有白紹稱美中國者故也

張尚為侍郎以言語辯捷見知擢為侍中中書令後
 主使尚鼓琴尚對曰素不能勅使學之後宴言次說
 琴之精妙尚因道晉平公使師曠作清角曠言吾君
 德薄不足以聽之後主意謂尚以斯喻已不說後積
 他事下獄皆追以此為詰後主嘗問尚詩云汎波相
 舟惟相中身乎尚對曰詩
 言檜楫松舟則松亦中舟也又問鳥之大者惟鶴小
 者惟雀乎尚對曰大者有秃鷲小者有鷦鷯性忌
 勝已而尚談論每出其表積以致恨後問狐飲酒以
 方誰尚對曰陛下有百斛之量皓曰尚知孔丘之不
 王而以孤方之因此發怒收尚尚書岑昏率
 公卿以下百餘人詣宮叩頭請尚罪得減死送建安
 作船久之又就加誅

宋文帝時朱循之虔滑臺為後魏所陷大武寵之初
 北人去來言循之勸誘大武侵邊並教大武以中國
 禮制文帝甚疑責之循之後得還具相申理帝意乃
 釋

孝武帝初與竟陵王誕同舉兵討元凶有奔牛之捷
 明年討南郡王義宣又有殊勳帝性多猜頗疑憚而
 誕造立第舍窮極巧工園池之美冠於一時多聚才
 力之士實之第內精甲利器莫非上品帝意愈不平
 建平二年乃出為使持節都尉督南徐兗二州諸軍
 事太子大傅南徐州刺史侍中如故帝以京口去都
 密邇猶疑之大明元年秋又出為都督南兗南徐兗

青冀幽六州諸軍事南兗州刺史

沈懷文孝武時爲侍中考武每宴集諸在坐者咸令沈醉懷文素不飲酒又不好戲調帝謂故欲異已謝莊嘗誡懷文曰卿每與人異亦何久懷文曰吾少來如此豈可一朝而變非欲異物性所得耳五年乃出爲晉安王子勛征虜長史廣陵太守

明帝初封湘東王虞愿爲國嘗侍帝立以藩國舊恩意遇甚厚累遷通直散騎卽帝性猜忌體肥憎風夏月嘗着皮小衣拜左右二人爲司風令史風起方面轉先啓聞星文災變不信太史不聽外奏勅靈臺知

星二人給愿嘗直內省有異先啓以相簡察

吳喜爲驍騎將軍嘗對賓客言漢高魏武本是何人明帝聞之益不悅其後誅壽寂之喜內懼因啓乞中散大夫帝猶疑駭至是會帝有疾爲身後之慮以喜素得人情疑其將來不能事幼主乃賜死

王景文爲中書監領揚州時明帝太子及諸皇子竝小帝稍爲身後之計諸將帥吳喜壽寂之徒竝殺之而景文外戚貴盛張永累經軍旅又疑其將來難信乃自謂謠言曰一士不可親弓長射殺人一士王字也弓長張字也及帝旣有疾而諸弟竝已見殺唯桂

楊王休範人才本劣不見疑出為江州刺史慮一旦不諱皇后臨朝則景文自然成宰相門族強盛籍元舅之重歲暮不為純臣泰豫元年春帝疾篤乃遣使送藥賜景文手詔曰與卿周旋欲全卿門戶故有此處分歿時年六十

帝性猜疑多慮故亟行誅戮南出則唱云西行東遊則唱云北

幸簡于出入竟不南郊又云帝末年好鬼神多忌諱言語文書有禍敗凶喪及疑似之言應迴者數百千品有犯必加誅戮改駟馬邊爪亦以駟字近禍故也以南苑借張永云且給三百年期訖更啓其事類皆如此宣陽門民間謂之自門其名不祥甚諱之尚書右丞江謐嘗誤犯帝變色曰白汝家門謐稽顙謝之

久方釋太后停屍漆床先出東宮帝嘗幸官見之怒甚免中庶子官職局以坐者數十人內外嘗慮犯觸人不自保宮內禁忌猶甚移床治壁必先祭土神使文士為文詞祝策如大祭饗

南齊鬱林王初為太孫武帝不豫詔竟陵王子良入侍醫藥日夜在殿內太孫間日入參承帝暴漸物議疑立子良俄傾而蘇問太孫所在遺詔子良輔政大孫少養於子良妃袁氏甚着慈愛既懼前不得立自此深忌子良大行出太極殿子良居中書省帝使虎賁中郎將潘敞領二百人屯伏太極西階之下成服後諸王皆出子良乞停至山陵不許

蒼梧王時豫章王嶷居清溪宅蒼梧夜中微行欲掩襲宅內嶷左右舞刀戟於中庭蒼梧從墻間窺見以為有備乃去

明帝建武中劉季連爲平西蕭遙欣長史南郡太守時帝諸子幼弱內親則仗遙欣兄弟外親倚后弟劉暄內弟江祐遙欣之錙江陵也意寄甚隆而遇欣至州多招賓自封植帝甚惡之李連族甥琅琊王會爲遙欣諮議叅軍美容貌頗事辨遙欣遇之甚厚會多慢忽於公座與遙欣競侮季連憾之乃密表帝稱遙欣有異跡帝納焉乃以遙欣爲雍州刺史帝心德季連以爲輔國將軍益州刺史令據遙欣上流陳顯達爲太尉侍中明帝欲悉除高武諸孫微言問顯達答曰此等豈足介意帝乃止

梁武帝時劉顯爲國子博士有沙門訟田帝大署曰貞有司未辯遍問莫知顯曰貞字文爲與上人帝因忌其能出之後爲雲麾邵陵王長史尋陽太守魏使李諧至聞之恨不相識嘆曰梁德衰矣善人國之紀也而出之無乃不可乎

劉峻字孝標爲荊州刺史安成王戶曹叅軍初武帝每集文士策經史事時范雲沈約之徒皆引短推長帝乃悅加其賞賚會策錦被事言已罄帝試呼問峻峻時貧悴冗散忽請紙筆數十餘事坐客皆驚帝不覺失色自是惡之不復見及峻類苑成凡一百二十

卷帝即命諸學士撰華林遍略以高之竟不見用乃著辯命論以寄其懷

元帝初為湘東王時蕭賁為法曹叅軍得一府歡心及亂帝為檄賁讀至偃師南望無復儲骨露寒河陽北臨或有穹廬擅帳乃曰聖製此句非為過似如體自朝廷非闕序賊帝聞之大怒收付獄遂以餓終又追戮賁尸乃著懷舊傳以謗之極言誣毀忠壯世子方等母徐妃以嫉妬失寵方等意不自安元帝聞之又忌方等益懼故書論以申其志焉

論具儲宮文學

王琳為衡州刺史時元帝性多忌以琳所部甚眾又得衆心故出之嶺外又授都督廣州刺史其友人主書李膺帝所任遇琳告之曰琳蒙拔擢嘗欲畢命以報國恩今天下未平遷琳嶺外如有萬一不虞安得球力忖官正疑琳耳琳分望有限可得與官爭為帝乎何不以琳為雍州刺史使鎮武寧琳自放兵作田為國禦捍若驚恐動靜相知執若遠棄嶺南相去萬里一日有變將欲如何琳非願長坐荆南正以國計如此耳膺然其言而不敢啓遂率其衆鎮嶺南

陸法和為都督郢州刺史法和善為攻戰具在江夏大聚兵艦欲襲襄陽而入武關元帝使止之法和曰

是求佛之人尚不希釋梵天王坐處豈規王位但於
空王佛所與主上有香火因緣見主上應有報至故
救援耳今既被疑是業定不可改也

樂良王大圍簡文子也元帝初徙封晉熙王瑯邪鼓
城二郡太守帝既有克復之功而大圍兄汝南王大
封猶未通謁帝性忌刻甚恨望之乃謂大圍曰汝兩
兄久不出汝可以意召之大圍即日曉諭兩兄相繼
出謁帝乃安

陳高祖以杜稜監義興瑯邪二郡帝誅王僧辯引稜
與侯景都等共議稜難之帝懼其泄已乃以手巾絞
稜悶絕于地因閉于別室軍發召與同行

後主 卽位鄱陽王伯山長子君範爲貞威將軍晉
陵太守隋師至是時宗室王侯在者百餘人後主恐
其爲變乃竝召入令屯朝堂使豫章王叔英總督之
而又陰爲之備及六軍敗績相率出降

樊猛爲忠武將軍南豫州刺史隋將韓擒虎濟江猛
在京師第六子巡攝行事擒虎進軍攻陷之巡及家
口並見執時猛與左衛將軍蔣元遜領青龍八十艘
爲水軍於白下遊奕以禦隋六合兵後主知猛妻子
在隋軍懼其有異志欲使任忠代之又重傷其意乃

止

北齊後主時蘭陵王長恭爲荊州刺史芒山之戰長恭爲中軍率五百騎再入周師後主謂長恭曰入陣大深失利悔無所及對曰家事親切不覺遂然帝憐其稱家事遂忌之後帝使飲以毒藥薨

斛律光爲右丞相率步騎五萬克復秦姚襄白亭城戍又取周建安等四戍而還軍未至鄴勅令便放兵散光以爲軍人多有勲功未得慰勞若即便散恩澤不施乃密通表請使宣旨軍仍且進朝廷發使遲留軍還將至紫陌光仍駐營待使後主聞光軍營已逼

心甚惡之恐令舍人追光入見然後宣勞散兵拜光右丞相又別封清河郡公

北平王貞武成第五子也位司州牧京畿大都督兼尚書令錄尚書事武成行幸總留臺事種年後主以貞長大漸忌之阿那肱承旨令馮士幹劾繫貞于獄奪其留後權

梁太祖時劉知俊威望益隆帝雄猜日甚會佑國軍節度使王重師無罪見誅知俊居不自安乃據同州叛送款於李茂貞又分兵以襲雍華雍州節度使劉捍被擒送鳳翔害之華州蔡敬思被傷獲免帝聞知

俊叛遣近臣諭之曰朕待卿甚厚何相負耶知俊報曰臣非背德但畏死耳王重師不負陛下而致族滅帝復遣使謂知俊曰朕科卿爲此昨重師得罪蓋劉捍言陰結邠鳳終不爲國家用我今雖知枉濫悔不可追致卿如斯我心恨恨蓋劉捍悞予事也捍死回未塞責知俊不報遂分兵以守潼關帝命劉鄩率兵進討攻潼關下之時知俊弟知浣爲親衛指揮使聞知俊叛自縊奔至潼關爲鄩所擒害之尋而王師繼至知俊乃舉族奔於鳳翔

庶人友珪以絞縊天下之望命翔爲宰相友貫請宣學士兼召諫臣言陰陽序理之端人事調和之本又嚴修祀典精事神祇宜令有司依奏處潔所云進忠良而退不肖除寇盜而恤憐寡雖責在朕躬亦資于調燮刑法舒條宜令大理寺御史臺明慎詳讞勿至寃誣選賢退愚宜令三銓選部精覈慎選所與得人新舊制勅令御史臺與三司官員詳擇以聞

周馮道初仕後唐明帝時平章事長興初帝御中興殿對道奏曰陛下宮中無事遊幸近郊則可矣然則御馬涉歷山險萬一馬足差跌則貽臣下之憂臣聞千金之子坐不垂堂百金之子立不倚衡彼千金百

金之微細尚猶惜其身保其產而况富有四海貴為天子自輕於彼千金百金之子哉愿陛下居安慮危動存戒慎上歛容謝之退令小黄門至中書勅道錄奏所對番堂語道因注其說以聞四年帝對宰臣曰諸州鎮數上言有螟蝗民力尚貧將來何以得濟道奏曰天灾流行古今嘗所不免自陛下臨御八年七年豐稔今操父子逼主篡位故乃羈旅萬里糾合士衆將以討賊今大敵未克而先自立恐人心疑惑昔高祖與楚約先破秦者王及屠咸陽獲子纓猶懷推讓况今殿下未出門庭便欲自立邪愚臣恐不為殿

下取也繇是忤旨左遷部丞出從事

惡直

闕文

吳大帝初為吳侯辟陸績為曹掾以直道見憚出為鬱林太守虞翻為騎都尉翻數犯顏諫爭大帝不能悅又性不協俗多見謗毀坐徙丹陽涇縣翻性既直數有酒失大帝與張昭論及神仙翻指昭曰彼皆妄人而語神仙世豈有神仙也大帝積怒非一遂徙翻交州

屈晃為尚書僕射大帝欲廢太子和立亮晃固諫不

止大帝大怒牽冕入殿杖一百

後主時王蕃爲散騎嘗侍體氣高亮不能承顏順旨時或逆意積以見責甘露二年後主大會群臣蕃沉醉頓伏後主大怒呼左右于殿下斬之衛將軍滕牧征西將軍留平請不能得

樓玄以大農爲宮下鎮禁中候主殿中事玄從九卿持刀侍衛正身率下奉法而行應對切直數逆後主意漸見責怒後人誣白玄與賀邵相逢駐共耳語大笑謗訕政事遂被詔責送付廣州後主疾玄名聲復徙玄及子據付交趾將張奕使以戰自効陰別勅奕令殺之

賀邵爲中書令領太子大傅後主克暴驕矜政事日獎邵上䟽切諫書奏後主深恨之後竟見殺

常曜爲侍中嘗領左國史時在所承旨數言瑞應後主以問曜曜答曰此人家箱篋中物耳又後主欲爲父和作紀曜執以和不登帝位宜名爲傳如是者非一漸見責怒後主於酒後使侍臣難折公卿以嘲弄侵克發摘私短以爲歡時有愆過或誤犯後主諱輒見收縛至於誅戮曜以爲外相毀傷內長尤恨使不濟濟非佳事也故但使難問經義言論而已後主以

冊府元龜 卷之三百一十八
為不承用詔命意不忠盡遂積前後嫌忿收矐付獄
誅之徙其家零陵

華覈為東觀令領右國史上疏諫後主後主不納後
以微譴免數年而卒

宋文帝時符全育為龍驤將軍元嘉中彭城王義康
出鎮豫章全育上表諫曰陛下若蕩以平聽屏此猜
情速召義康返于京甸兄弟協和則四海之望塞讒
說之道消矣表奏即收付建康獄賜歿

孝武帝時沈懷文為侍中懷文與顏峻周朗素善峻
以失旨見誅朗亦忤意得罪帝謂懷文曰峻若知我
殺之亦當不敢如此懷文嘿然嘗以歲夕與謝莊王
景文顏師伯被勅入省未及進景文因言次稱峻朗
人才之美懷文與相調和師伯後因語次白帝叙景
文等此言懷文屢經犯忤至此帝倍不悅

蔡興宗為侍中時孝武拜陵興宗負輿陪乘及還帝
欲因以射雉興宗正色曰今致虔園陵情敬兼重從
禽從猶有餘日請待他辰帝大怒遣令下車繇是失
旨

廢帝時王玄謨為領軍將軍朝政多門玄謨以嚴旨
不容徙青冀二州刺史

明帝時虞愿爲通直散騎侍郎初帝以宅起湘宮寺立佛刹各五層新安太守巢尚之罷郡還見帝曰卿至湘宮寺來我起此寺是大功德愿在側曰陛下起此寺皆是百姓賣兒貶婦錢有何功德帝大怒使人驅下殿

梁高祖時江子四爲右丞左民郎沈禮明少府丞顧璵奏事不允高祖厲色呵責之子四乃趨前代禮明等對言甚激切高祖怒呼縛之子四據地不受高祖怒亦給乃釋之猶坐免職

陳後王時毛喜爲侍中後主爲始興王所傷及瘡愈而自慶置酒于後殿引江總以下展樂賦詩醉而命喜于時山陵初畢未及踰年喜見之不憚欲諫而後主已醉升階陽爲心疾仆于階下後出省中後主醒而疑之謂江總曰我悔召毛喜知其無疾但欲阻我歡宴非我所爲故姦詐耳乃與司馬申謀曰此人負氣吾欲將乞鄱陽兄弟聽其報讐可乎對曰終不爲宮用願如聖旨傳緯爭之曰不然若許報讐欲置先皇何地後主曰當乞一小州勿令見人事乃除永嘉內史

蔡凝爲黃門侍郎後主嘗置酒會群臣歡甚將移醢

於弘範宮衆人咸從唯凝與表憲不行後主曰卿何為者凝對曰長樂尊嚴非酒後所過臣不敢奉詔衆部諸人失色後主曰卿醉矣令引出後主謂吏部尚書蔡徵曰蔡凝負地矜才無所用也尋遷晉熙長史章華為大市令禎明初上書極諫後主大怒即日命斬之

北齊文宣帝時高德政為尚書右僕射兼侍中文宣末年縱酒酣醉所為不法德政屢進忠言帝不悅李集為御史丞文宣肆行淫暴凡所殺害多令支解集面諫帝比於桀紂帝令縛置漳流中沈沒久之後

遂腰斬

李雅廉為大原郡守文宣嘗召見問以治方語及政行寬猛帝意深文峻法雅廉固以為非帝意不悅語及楊愔悞稱為楊公以應對失宜除濟陰郡守帶西兖州長史

孝昭帝初為嘗山王文宣昏亂日甚帝承間嘗諫遂至忤旨文宣使力士按伏白刃注頸罵曰小子何知欲以吏才非我是誰教汝帝曰天下噤口除臣誰敢有言文宣催遣播楚亂杖扶數十命醉卧得解崔劼為五兵尚書武成將禪後主先以問劼劼諫以

為不可辭是忤旨出為南兗州刺史

册府元龜

淮南李嗣京叅閣

西極文翔鳳訂正

豫章黃國琦較釋

僭偽部

總序

夫餘分為閏既異夫居正之統王綱失紐或有乎僭
命之號斯蓋豪傑竊起以蓄乎覬覦強弱相凌分據
乎土宇雖政令之自出非運序之所繫自魏武徙氏
寇之種雜處秦州晉氏之興厥類彌熾罔徇名臣之

議失於長世之御亂華之暴乘間而作故劉淵以五部之衆起於離石石勒因晉陽之甲據乎襄國厲階之構乃繇於此而李特以流徙之隸奄宅益部而爲蜀慕容廆因封建之舊保界遼碣而爲燕羣雄競起宇內分裂河西之區張軌攸領因而稱制是稱前凉自此晉綱絕紐中原震蕩龜玉南徙遂荒江介其後符洪自冀州之廣川建三晉之號入寇關輔居長安而爲秦李暠跨敦煌之地雄西夏而稱西凉慕容垂守中山之國蹈兩河而爲後燕乞伏國仁憑河湟之輿而爲西秦呂光按酒泉之富而爲後凉姚萇乘符氏之業而爲後秦馮跋踐昌黎之域而爲北燕禿髮烏孤負西平之阻而號南凉慕容德依廣固之險而爲南燕沮渠蒙遜保張掖而爲北凉赫連勃勃連朔方而稱夏凡十有六國焉俱僭大號各建正朔或稱王爵並專誅賞傳世垂祚歷歲彌久而率多戎虜之種或出氐羗之類始愆制馭終以疆大分宰諸夏專制民命吞并相繼兵難不絕家國殊政百有餘年洎宋祖之奮威及元魏之雄視芟夷掃蕩剪焉靡餘以至唐室之季王度交喪禮樂征伐不出於朝廷山河疆理遂分於土壤王審知跨據山海裂五郡而爲閩

王建憑恃巖險包三川而爲蜀楊行密宅淮海之壤
擅魚鹽之富建號而稱吳劉陟摠百越之衆通珠貝
之利開國而爲漢其後孟知祥因同光之難憑二劍
之固僭尊名而爲後蜀李昇承吳人之業保重江之
阻冒舊服而爲唐劉崇以漢室之亡托於宗胃仍厥
位號保於太原而吳唐二蜀繼守其宇七閩之亂厥
土三分顯德之世尚餘四國皇朝受命始平井絡旋
殄五嶺後克江表三晉遺孽再駕而服混一區內以
致太平今自西晉之後洎唐宋諸國論次其事類以
爲僭僞部凡三十七門

姓系

年號

姓系

夫胙土命氏事存於魯史別生分類義載於虞書蓋
所以辨族類而定嫌疑厚人倫而正宗祀也若夫傑
黠之流乘時射利割據州壤負阻山河或保聚方隅
或饕竊大號雖遊魂假息寧亂紀於帝圖然瓜割豆
分或編各於惇史源流所自祚裔攸存廣記備言旣
可徵於舊史洽聞殫見將有助於方來爰用討論咸
從編次

前凉張軌字士彥安定烏氏人漢嘗山景王耳十七

世孫也家世孝廉以儒學顯父温爲太官令軌晉惠
帝時爲散騎嘗侍征西軍司馬永寧初出爲護羌較
尉涼州刺史愍帝時進位司空固讓又拜侍中大尉
涼州牧西平公軌又固辭在州十三年表立子寔爲
世子卒年六十謚曰武公州人推寔攝父位寔字安
孫愍帝因下策書授持節都督涼州諸軍事西中郎
將涼州刺史領護羌較尉西平公在位六年爲帳下
闞涉所害私謚曰昭公元帝賜謚曰元子駿年幼弟
茂攝事州人推茂爲大都督大尉涼州牧茂不從但
授使持節平西將軍涼州牧在位五年卒私謚曰成

成無子寔子駿嗣位駿字公庭在位二十二年卒私
謚曰文公穆帝追謚曰忠成公第二子重華嗣位自
稱持節大都督太尉護羌較尉涼州牧西平公假涼
王重華字泰臨在位十一年卒私謚曰昭公後改曰
桓公穆帝賜謚曰敬烈子耀靈年十歲嗣事稱大司
馬較尉刺史西平公在位一年爲伯父祚所害私謚
曰哀公祚字太伯自稱大都督大將軍涼州牧永和
十年祚僭稱帝位篡立三年爲其下張濤等所殺立
耀靈庶弟玄靚爲大都督大將軍較尉涼州牧西平
公玄靚字元安在位九年爲駿少子天錫所害私謚

曰冲公孝武帝賜謚曰敬悼公天錫自號大將軍較

尉涼州牧西平公在位十三年隆于符堅自軌為涼州至天錫

片九世七十六年

西涼李暠字玄盛小字長生隴西成紀人漢前將軍

廣之十六世孫也廣曾祖仲翔漢初為將軍討叛氐

於素昌素昌即狄道也眾寡不敵死之仲翔子伯考

奔喪因葬於狄道之東川遂家焉世為西州右姓高

祖雍曾祖柔仕晉並歷位郡守祖弁仕張軌為武衛

將軍家世亭侯父景幼有令名早卒遺腹生暠呂光

未段業所署沙州刺史孟敏署暠效穀令敏卒護軍

郭謙治中索德等推玄盛為敦煌太守稱藩於業

安帝隆安四年晉昌太守唐瑒推玄盛為大都督將

軍涼公領秦涼二州牧護羌較尉在位十八年年六

十四私謚曰武昭王子歆嗣歆字士業小字桐稚在

位四年為沮渠蒙遜所滅弟敦煌太守恂為郡人宋

承等所推為涼州刺史二年又為蒙遜所滅始暠以安帝隆

安四年僭位凡三世二十四年

前趙劉淵字元海新興匈奴人冒頓之後也初漢高

祖以宗女為公主以妻冒頓約為兄弟故其子孫遂

冒姓劉氏後漢建武初烏珠留若鞮單于子右奧鞮

冒姓劉氏後漢建武初烏珠留若鞮單于子右奧鞮

日逐王比自立為南單于入居西河美稷今離石左
 國城即單于所徙庭也中平中單于羗渠使子於扶
 羅將兵助漢討平黃巾會羗渠為國人所殺於扶羅
 以其眾留漢自尊為單于屬董卓之亂寇掠大原河
 東屯於河內於扶羅死弟呼厨泉立以於扶羅子豹
 為左賢王即元海之父也魏武分其眾為五部以豹
 為左部帥其餘部帥皆以劉氏為之大康中改置都
 尉左部居大原茲氏右部居祁南部居蒲子北部居
 新興中部居大陵劉氏雖分居五部然皆家于晉陽
 汾澗之濱豹生元海晉惠帝時為成都王穎所行北

單于永興元年僭稱漢王永嘉二年僭即皇帝位在
 位六年偽謚光文皇帝太子和立和字玄泰嗣偽位
 為弟聰所害聰字玄明一名載元海第四子以永嘉
 四年僭即皇帝位在位九年偽謚曰昭武皇帝子粲
 嗣偽位粲字士光在位一年為靳準所殺元海族子
 曜自長安赴難至於赤壁偽太保呼延宴等迎立之
 以大興元年僭即皇帝位曜字永明在位十年為石
 勒所殺元海自懷帝永興元年僭位
 至曜三世凡二十有七年
 後趙石勒字世龍初名匄上黨武鄉羯人也其匈奴
 別部羗渠之胄祖邪奕於父周末一名乞翼加並為

部落小率勒仕劉元海為平東大將軍封親漢王晉
 元帝大興二年偽稱趙王成帝咸和五年僭號趙天
 王行皇帝事尋僭即皇帝位在位十五年年六十子
 弘嗣偽位弘字大雅在位二年年二十二為勒從子
 虎所廢尋殺之虎字季龍稱居攝趙天王咸康三年
 僭稱大趙天王穆帝永和五年僭即皇帝位六年季
 龍死在位十五年子世立凡三十日為兄遵所廢
 遵立一百八十三日為冉閔所殺立石鑒鑒在位一
 百三日為閔所殺始勒以成帝咸和三年僭閔字永
 曾小字棘奴季龍之養孫也父瞻字弘武本姓冉名

賈魏郡內黃人也其先漢黎陽騎都督累世牙門勳
 破陳干獲瞻時年十二命季龍之子驍猛多力攻戰
 無前歷位左積射將軍西華侯閔幼而果銳季龍撫
 之如孫永和六年殺石鑒自立僭位二年為慕容雋
 所滅

前燕慕容廆字奕維瓌昌黎棘城鮮卑人也其先有
 熊氏之苗裔世居北夷邑於紫蒙之野號曰東胡其
 後與匈奴並盛控弦之士二十餘萬風俗官號與匈
 奴畧同秦漢之際為匈奴所敗分保鮮卑山因以為
 號魯祖莫護跋魏初率其諸部入居遼西從宣帝伐

公孫氏有功拜率義王始建國於棘城之北時燕代多冠步搖冠莫護跋見而好之乃斂髮襲冠諸部因呼之為步搖及後音訛遂為慕容或云慕二儀之德繼三光之容遂以慕容為氏祖木延左賢王父涉歸以全柳城之功進拜鮮卑單于遷邑於遼東北於是漸慕諸夏之風矣庖晉武帝太康中為鮮卑都督累轉遼東公持節都督幽州諸軍事車騎將軍平州牧大單于在位四十九年年六十五成帝遣使者策贈大將軍開府儀同三司謚曰襄第三子皝嗣位皝字元真帝遣謁者拜鎮軍大將軍平州刺史大單于遼

東公咸康三年僭即天王位在位十五年年五十二年第二子雋立雋字宣英穆帝永和五年僭即燕王位八年僭即皇帝位在位十一年年四十二子暉嗣僞位暉字景茂在位一十一年為符堅所滅始庖以武帝大康六

年稱公至暉四世凡八十五年

前秦符洪字廣世畧陽臨渭氏人也其先蓋有扈之苗裔為西戎酋長始其家池中蒲生長五丈五節如竹形時咸謂之蒲家因以為氏焉父懷歸部落小帥洪仕石季龍累有戰功封西平郡公穆帝永和六年季龍死洪口稱大將軍大單于三秦王改姓符氏是

年洪死年六十六子健嗣位去秦王之號七年僭稱
 天王大單于八年僭即皇帝位健字建業在位四年
 年三十九子生嗣偽位生字長生在位二年年二十
 三為符堅所殺堅字永固一名文王洪季子雄之子
 也以升平元年僭稱大秦天王在位二十七年年四
 十八孝武太元十年為姚萇所滅堅庶長子丕僭即
 皇帝位於晉陽丕字永叙在位二年為慕容永所敗
 堅庶孫登以太元十一年僭即皇帝位登字文高在
 位九年年五十二為姚興所滅始建以穆帝永和七
 年僭立至登五世凡
 四十
 四年

後秦姚弋仲南安赤亭羌人也其先有虞氏之苗裔
 禹封舜少子於西戎世為羌酋其後燒當雄於洮罕
 之間七世孫填虞漢中元末寇擾西州為楊虛侯馬
 武所敗徙出塞虞九世孫遷郗率種人內附漢朝嘉
 之假冠軍將軍西羌較尉歸順王處之於南安之赤
 亭那玄孫柯迴為魏鎮西將軍綏戎較尉西羌都督
 迴生弋仲仕石季龍為征西大將軍封西平郡公晉
 穆帝永和七年遣使降晉拜六夷大都督大單于封
 高陵郡公八年弋仲卒子襄嗣襄字景國升平元年
 為符堅所殺弟萇降堅萇字景茂堅以為楊武將軍

累遷龍驤將軍孝武大元九年自稱大將軍大單于
 萬年秦王以大元十一年僭卽皇帝位在位八年年
 六十四長子興嗣自稱大將軍明年僭卽皇帝位興
 字子畧在位二十二年年五十一長子泓嗣以義興
 十一年僭卽皇帝位泓字元子在位二十年年二十
 為晉所滅始萇以孝武大元九年僭
立至萇三世凡三十三年
 後蜀李特字玄休巴西宕渠人其先廩君之苗裔也
 昔武落鍾離山崩有石穴二所其一赤如丹一黑如
 漆有人出於赤穴者名曰務相姓巴氏有出於黑穴
 者凡四姓曰暉氏樊氏栢氏鄭氏五姓俱出皆爭為

神於是相與以劍刺穴屋能著者以為廩君四姓莫
 著而務相之劍懸焉又以土為船彫畫之而浮水中
 曰若有船浮存者以為廩君務相船又獨浮於是遂
 稱廩君乘其土船將其徒卒當夷水而下至於監陽
 水神女子止廩君曰此魚鹽所有地又廣大與君俱
 生可止無行廩君曰我當為君求廩地不能止也鹽
 神夜從廩君宿旦輒去飛虫諸神皆從其飛蔽日晝
 昏廩君欲殺之不可別又不知天地東西如此者十
 日廩君乃以青縷遺鹽神曰嬰此卽宜之與汝俱生
 弗宜將去汝鹽神受而嬰之廩君立碭石之上望膺

有青縷者跪而射之中監神監神死羣神與俱飛者皆去天乃開朗廩君復乘土船下及夷城夷城石岸曲泉水亦曲廩君望如穴狀嘆曰我新從穴中出今又入此柰何岸郎為摧廣三丈餘而階陛相乘廩君登之岸上有平石方一丈長五尺廩君休其上投策計筭皆若石焉因立城其旁而居之其後種類遂繁秦并天下以為黔中郡簿賦役之口歲出錢四十巴人呼賦為寶因為寶人焉特父纂為東羌獵將特晉武帝元康中隨流人至蜀其後流人特為主行鎮北大將軍惠帝大安元年自稱益州牧都督梁益二州

諸軍事在位二年為晉益州刺史羅尚所殺特弟流自稱大將軍大都督益州牧流字玄通年五十六死特子雄自稱大都督大將軍益州牧永興元年僭稱成都王又僭即帝位雄字仲雋在位三十年年六十一兄蕩之子班嗣偽位班字世文為李越所殺在位一年年四十七遂立雄之子期字世運在位三年年二十五為李壽所廢自縊死壽字武考特弟驥之子在位五年年四十四長子勢嗣偽位勢字子仁在位五年為晉所滅始特以惠帝大安元年起兵至勢六世凡四十六年後涼呂光字世明畧陽人也其先呂文和漢文帝

初自沛避難徙焉世為酋豪父婆樓佐命符堅官至
太尉光任符堅為都督五門巴西諸軍事安西將軍
西域較尉堅為姚萇所害光於是自稱使持節侍中
中外大都督督隴右河西諸軍事大將軍領護匈奴
中郎將涼州牧酒泉公晉孝武大元十四年僭即三
河王位二十一年僭即天王位在位十年年六十嫡
子紹嗣偽位為庶長子纂所殺纂字永緒僭即天王
位在位三年為呂起所殺立光弟寶之子隆嗣偽位

隆字永基為姚興所滅

始光以孝武大元十三年定涼州十五年僭立至隆凡十

載有三

後燕慕容垂字道明前燕慕容皝之第五子慕容皝
時封為吳王慕容暉為符堅所滅垂在堅朝歷位京
兆尹堅敗垂引兵至滎陽以晉孝武大元八年自稱
大將軍大都督燕王在位十三年年七十一子寶嗣
寶字道祐在位三年年四十四子盛嗣盛字道運在
位三年年二十九垂少子熙嗣熙字道文在位六年
年二十三為寶養子雲所弒雲字子雨祖父高和居
驪之支庶自云高陽氏之苗裔故以為高氏焉始垂以孝
武大元八年僭立至熙四世凡二十四年雲尋為幸臣離班姚仁所殺
西秦乞伏國仁隴西鮮卑人也在昔有如弗斯出連

叱盧三部自漢北南出大陰山遇一巨蟲於路其狀若神龜大如陵阜乃殺馬而祭之祝曰若善神也便開路惡神也遂塞不通俄而不見乃有一小兒在焉時又有乞伏部有老父無子者請養為子眾咸許之老父欣然自以有所依憑字之曰紇干紇干者夏言依倚也年十歲驍勇善射彎弓五百斤四部服其雄武推為統主號之曰乞伏可汗託鐸莫何託鐸者言非神非人之稱也其後有祐鄰者即國仁五世祖也晉武帝泰始初率戶五千遷於夏緣部眾稍盛鮮卑鹿結七萬餘落屯於高平川與祐鄰迭相攻擊鹿結

敗南奔畧陽祐隣盡并其眾因居高平川祐隣死子結權立徙於牽屯結權死子利鄰立擊鮮卑吐賴於烏樹山討尉遲渴權於大非川收眾三萬餘落利鄰死弟祁湫立祁湫死利鄰子述延立討鮮卑莫侯於苑川大破之降其眾二萬餘落因居苑川以叔父軻湫為師傅委以國政斯引烏湫為左輔將軍鎮蔡園川出連高胡為右輔將軍鎮至便川叱盧鄰胡為率義將軍鎮牽屯山述延死子儁大寒立會否勒滅劉曜懼而遷於麥田無孤山大寒死子司繁立始遷於度堅山尋為符堅將王統所襲部眾叛降於統司繁

歎謂左右曰智不距敵德不撫衆劍騎未交而本根已敗見衆分散勢亦難全若奔諸部必不我容吾將爲呼韓邪之計矣乃詣統降於堅堅悅署爲南單于留之長安以司繁叔父吐雷爲勇士護軍撫其部衆俄而鮮卑勃寒侵斥隴右堅以司繁爲使持節都督討西胡諸軍事鎮西將軍以討之勃寒懼而請降司繁遂鎮勇士川甚有威惠司繁卒國仁代鎮孝武大元十年自稱大都督大將軍大單于領秦河二州牧在位四年弟乾歸嗣乾歸在位二十四年子獻磐嗣獻磐在位十五年子慕末嗣慕末在位四年爲赫連

言所殺

始國仁以孝武大元十年僭位至慕末凡四世四十有六載而滅

北燕馮跋字文起長樂信都人也小字乞直伐其先畢萬之後也萬之子孫有食菜馮卿者因以氏焉永嘉之亂跋祖父和避地上黨父安雄武有器量慕容水時爲將軍永滅跋東徙和龍家於長谷跋爲慕容雲所署使持節侍中都督中外諸軍事雲爲其幸臣所殺跋乃僭稱天王於昌黎在位二十二年弟弘立九年爲後魏所滅始跋以安帝義熙五年僭立至弘凡二世二十八年南涼秃髮烏孤西河鮮卑人也其先與後魏同出八世祖匹孤率其部自塞北遷於河西其地東至麥田

牽屯西至濕羅南至澆河北接大漠匹孤卒子壽闐
 立初壽闐之在朶母胡掖氏因寢而產於被中鮮卑
 謂被為禿髮因而氏焉壽闐卒孫樹機能立壯果多
 謀畧晉武帝泰始中殺秦州刺史胡烈於萬斛堆殺
 涼州刺史蘓愉於金山盡有涼州之地武帝為之肝
 食後為馬隆所敗部下殺之以陰弟務丸立死孫堆
 斤立死子思復鞬立部衆稍盛烏孤即思復鞬之子
 也安帝隆安元年自稱大都督大將軍大單于西平
 王在位三年弟利鹿孤立徙居西平利鹿孤在位三
 年弟儁擅嗣儁擅僭號涼王遷於樂都在位十三年

年五十一為乞伏熾磐所滅始烏孤以安帝隆安元
 年僭立凡三世十有九
 年

南燕慕容德字玄明後燕慕容垂之弟垂稱燕王以
 德為車騎大將軍垂死子寶嗣寶以德為丞相領冀
 州牧承制南夏晉安帝隆安四年僭即皇帝位在位
 五年年七十兄子超嗣超字祖明在位六年為晉所
 滅始德以安帝隆安四年僭
 立至超二世凡十一年
 北涼沮渠蒙遜臨松盧水胡人也其先世為匈奴左
 沮渠遂以官為氏焉蒙遜仕段業為張掖太守晉安
 帝隆安五年梁中庸等推為使持節大都督大將軍

涼州牧義熙八年僭立在偽位三十三年年六十六
子茂慶立六年為後魏所擒九二世三十九載

夏赫連勃勃字屈子匈奴右賢王去卑之後劉元海
之族也曾祖武劉聰世以宗室封樓煩公拜安北將
軍監鮮卑諸軍事丁零中郎將雄據肆盧川為代王
倚盧所敗遂出塞表祖豹子招集種落復為諸部之
雄石季龍遣使訖拜平北將軍左賢王丁零單于父
衛辰入居塞內符堅以為西單于督攝河西諸虜屯
於代來城及堅國亂遂有朔方之地控弦之士三萬
八千後魏師伐之辰令其子力侯提距戰為魏所敗

魏人乘勝濟河尅代來執辰殺之勃勃乃奔於叱干
部晉安帝義熙三年僭稱天王大單于自以匈奴夏
后氏之苗裔也國稱大夏又下書曰朕之皇祖自北
遷幽朔姓改妣氏音殊中國故從母氏為劉子而從
母之姓非禮也古人氏族無嘗或以因生為氏或以
王父之名朕將以義易之帝王者係天為子是為徽
赫實與天連今改姓曰赫連氏庶協皇天之意永享
無疆之慶係天之尊不可令支庶同之其非正統皆
以鐵代為氏庶朕宗族子孫剛銳如鐵皆堪伐人勃
勃在位十三年子昌嗣偽位尋為後魏所擒弟定僭

號於平涼遂為魏所滅

自勃勃至定凡二十有六載

閩王審知字信通光州固始人父恁世為農民唐僖宗廣明中黃巢犯闕江淮盜賊蜂起有賊帥王緒者自稱將軍陷固始縣審知兄潮時為縣佐緒署為軍正蔡賊秦宗權以緒為光州刺史尋遣兵攻緒緒率眾渡江所在剽畧自南康轉至閩中入臨汀自稱刺史緒多疑忌為部將所殺唐僖宗光啓二年福建觀察使陳巖表潮為泉州刺史昭宗大順中巖卒子壻范暉自稱留後潮遣審知將兵攻之斬暉而降跡是盡有閩嶺五州之地潮即表其事昭宗因建威武軍

於福州以潮為節度福建管内觀察使命審知為副

乾寧中潮卒審知遂繼兄位封琅邪郡王梁開平中

封閩王後唐同光元年審知卒子延翰嗣為弟延均

所殺延均自稱帝國號大閩末帝清泰二年遇弒子

昶嗣昶遇弒審知少子延羲嗣延羲遇弒兄延政自

稱帝於建州晉開運三年為李景所滅始王氏以唐光啓丙午歲

據有閩越凡二世七王通六十年

前蜀王建字光圖陳州項城人也父慶里之豪右唐

僖宗光啓元年入蜀州為壁州刺史率兵攻陷閬利

二州又攻陷成都昭宗隆紀元年授西川節度副大

使知節度事梁太祖開平二年建自帝於成都國稱
大蜀在位十二年年七十二子衍嗣衍字化源在位

七年年二十五為後唐所滅

建自唐光啓初入蜀父子相承凡四十年

吳楊行密廬州人唐僖宗光啓初秦宗權擾淮右郡將募能致戰擒賊者行密應募補為隊長因殺郡將自權州兵朝廷因正授廬州刺史大順二年畧有淮南之地乾寧二年授淮南節度副太使知節度事封弘農郡王哀帝天祐三年卒子泥龔其位自稱吳王在位三年為大將張顥所殺別將徐溫殺顥立泥躬渭凡十餘年溫乃冊渭為天子國號大吳渭僭號三年而卒溫乃推行密幼子浦為主晉天福二年浦遜位溫養子李昇

自唐大順二年至晉天福二年凡四十七年

前漢劉陟其先彭城人祖仁安仕唐為潮州長史因家嶺表父謙為廣州牙較以軍功拜封州刺史領賀水鎮使謙卒子隱復領賀水鎮兼封州刺史唐末嶺南節度使徐彥若薨表隱為兩使留後梁太祖為梁王時表陟為嶺南節度使關平初累封南海王四年卒陟隱之弟也代據其位梁末帝貞明二年僭號於廣州國號大漢後改曰龔

龔讀為儼古文無此字蓋妄撰也晉高祖天福七年卒年五十四長子玠嗣玠在位一年陟弟

二子晟殺玠自立晟周顯德五年卒長子銀嗣皇朝
開寶三年為王師所滅始陟自梁貞明三年僭號
歷三世四主九五十五年

後蜀孟知祥字保裔邢州龍岡人也祖察父道世為

郡較伯父方立終於邢維節度使從父遷位至澤潞

節度使知祥後唐莊宗同光三年授西川節度副大

使知節度事愍帝應順元年正月稱帝於蜀七月卒

年六十一其子昶襲偽位皇朝乾德三年為王師所

平知祥自後唐同光三年入
蜀父子相承九四十年

後唐李昇本海州人偽吳大丞相徐溫之養子也溫

字敦美亦海州人初從淮南節度使楊行密起兵於

盧州漸至軍較唐末青州王師範為梁祖所攻乞師

於淮南楊行密發兵赴之溫時為小將亦預行其師

次青之南鄙師範已敗淮兵大掠而還昇時幼穉為

溫所虜溫愛其惠黠遂育為己子名曰知誥溫仕吳

至大丞相都督中外諸軍事諸道都統封東海王溫

卒昇為中書令累封齊王晉高祖天福二年楊浦遜

位於昇國號大齊昇自云唐玄宗第六子承王璘之

裔天寶末安祿山連陷兩京玄宗幸蜀詔璘為山南

嶺南黔中江南四道節度採訪等使璘至廣陵大募

兵甲有窺圖江右之志後為官軍所敗死於大庾嶺

此故昇指以為遠祖因還姓李氏始改名曰昇國號
大唐昇僭位七年卒長子景嗣位皇朝建隆二年卒
子熈襲偽位開寶八年為王師所平

世三十
九年

始昇以晉天福
二年僭位凡三

後漢劉崇大原人漢高之從弟也乾祐初為北京留
守周太祖廣順元年崇僭號於河東稱漢改名昝世
宗顯德二年卒子承均襲偽位承均卒子繼元嗣皇
朝太平興國四年為王師所平

年號

自晉氏失馭中原之主瞻烏逐鹿亂靡有定錄是五

胡乘釁為天下倡屬而和之者十有六焉洎土運凌
遲五代喪亂跨州連郡僭竊相高咸建號紀年以備
制度前代策書悉載其事今之論次所以明其叛換
之迹為將來之戒耳

前涼張軌晉永寧元年為涼州刺史都姑臧惠帝封
西平公自軌至耀靈六世稱晉建興年號至四十二
年張祚僭即帝位始改元和平祚為張權所殺立軌
子玄靚

張玄靚自號涼州牧西平公復稱建興四十三年至
四十九年改始元升平三年為張天錫所殺

張天錫自號涼州牧西平公請命於晉在偽位十三年為符堅所滅本傳無年號

西涼李暠字玄盛唐以暠為祖故載紀稱字晉安帝隆安四年晉

昌太守唐瑤推玄盛為大都督涼公領秦涼二州牧

玄盛乃赦其境內建元為唐子義熙元年改為建初

在位十八年唐子五年建初十三年子歆嗣

李歆字士業嗣位涼公領涼州牧改元嘉興在位四

年為沮渠蒙遜所滅歆弟恂為燉煌人郡所立本傳

無年號按帝王真偽記年號永建二年

前趙劉淵字元海唐高祖淵故晉惠帝永興元年僭

即漢王位於左國城南郊赦其境內年號元熙永嘉

二年僭即皇帝位於蒲改元永鳳是年遷都平陽汾

水中得玉璽文曰有新保之蓋王莽時璽也得者因

增泉海光三字元海為已瑞大赦境內改年河瑞元

海在位六年永嘉四年元海死子和嗣偽位為弟聰所殺無

年號

劉聰僭即皇帝位大赦境內改元光興二年劉曜陷

維陽遷晉懷帝及惠帝羊后傳國六璽於平陽聰大

赦改年嘉平三年以大廟新成大赦境內改年建元

三年改元麟嘉聰在位九年水興元年聰死子粲嗣

劉粲既嗣偽位大赦境內改元漢昌在位一月為偽大將軍錄尚書事靳準所殺準自號漢大主稱藩於

晉

劉曜元海之族子以偽相國都督中外諸軍事鎮長安靳準既殺劉粲曜自長安赴之至於赤壁偽太尉范隆等上尊號僭即皇帝位晉太興元年大赦境內唯準一門不在赦限改元光初曜在位十年而敗

後趙石勒晉大興二年偽稱趙王依春秋列國漢初侯王母世稱元改稱趙王元年至十一年改元太和三年僭即皇帝位大赦境內改元建平在位十五年

太子弘嗣

石弘既嗣位改元延熙晉咸和七年二年石勒從子季龍

幽之逼禪於季龍石虎字季龍唐太祖諱虎故載記稱字以晉咸

康元年廢石弘羣臣勸稱尊號季龍下書曰朕聞道

合乾坤者稱皇德協人神者稱帝皇帝之號非所敢

聞但可稱居攝趙天王以副天人之望於是赦其境

內改年建武至十四年僭即皇帝位於南郊大赦境

內建元曰大寧明年季龍死凡在位一十五年子世

嗣晉永和五年石世在偽位三十三年為兄遵所殺無年

號

石遵在偽位一百八十三日為弟鑒所殺無年號

石鑒在偽位一百三日為季龍養孫冉閔所殺年號

青龍

石祗聞鑒死僭尊號於襄國為冉閔所滅無年號

冉閔殺石鑒自立改國號大魏建元曰永興復姓冉

氏明年為慕容雋所滅

前燕慕容雋晉永和五年僭即燕王位依春秋列國

故事稱元年二年雋既尅冉閔蔣幹以傳國重送於

建業雋欲神其事業言歷運在巳乃詐云閔妻得之

以獻賜號曰奉重君因以永和八年僭即皇帝位大

赦境內建元曰元璽其後雋太子暉死復立次子暉

為皇太子赦其境內改元曰光壽在位十一年元璽五年

光壽六年雋死于暉嗣

慕容暉晉升平四年僭即皇帝位大赦境內改元曰

建熙暉在位十一年以晉太和五年為符堅所滅

前秦符健晉永和七年僭稱天王大單于赦境內死

罪建元皇始明年健僭皇帝位于太極殿在位四年

子生嗣

符生僭皇帝位大赦境內改元壽光時晉永和十二

年也在位二年為從弟堅所殺

符堅晉升平元年僭稱大秦天王赦其境內改元曰永興後南遊霸陵大赦改元為甘露又改元為建元在位三十年永興三年甘露六年晉大元十年為姚萇所殺

符丕堅之長庶子也堅死丕僭即皇帝位於晉陽南立堅行廟大赦境內改元曰大安明年為慕容永所殺晉太元十一年

符登堅之族子丕死尚書寇遺等推立登僭即皇帝位大赦境內改元曰太初在位九年為姚興所殺太元十九年

符崇登之子登敗奔於湟中僭稱皇帝號改元曰延初為乞伏乾歸所殺

後秦姚萇晉太元九年自稱大將軍大單于萬年秦王年號白雀稱制行事十一年僭即皇帝位於長安大赦改元建初國號大秦在位八年白雀二年萇死太子興嗣

姚興僭即帝位於槐里大赦境內改元曰皇初遂如安定其後以日月薄蝕降號稱王大赦改元弘始在位二十二年皇初四年弘始十八年晉義熙十一年死子泓嗣

姚泓僭即皇帝位改元永和在位二年為晉所滅晉義熙

年號

熙十三
年也

後蜀李特晉永安元年自稱益州牧都督梁益二州
諸軍事大將軍大都督改元建初赦其境內明年特
死弟流嗣

李流無年號

李雄特弟二年流死雄自稱大都督大將軍益州牧
言永興元年僭稱成都王赦其境內建元為建興永
和范長生勸雄稱尊號雄於是僭即帝位赦其境內
改元大武按帝王真偽
記云晏平又改玉衡雄在位三十年建
興
二年大武四年太子班嗣

李班嗣偽位為弟越所殺無年號

李期雄第四子越既殺班以期雄妻任氏所養乃讓
位於期僭即帝位大赦境內改元玉恒期在位三年
李壽晉咸康四年僭即偽位赦其境內改元為漢興
壽在位五年子勢嗣

李勢嗣偽位赦其境內改元曰太和其後為太保李
奕自晉壽舉兵反勢誅奕大赦境內改元嘉寧勢在
位五年太和三年
嘉寧二年為晉所滅

後涼呂光初為符堅安西將軍既入姑臧自領涼州
刺史晉太元十年堅死光於是大赦境內建元曰太

安自稱涼州牧酒泉公是時麟見金澤縣百獸從之
光以為已瑞以晉孝武大元十四年僭即三河王位
置百官自丞郎已下赦其境內年號麟嘉太元二十
一年僭即天王位改元龍飛在位十年麟嘉七年龍
飛三年太安
不頂因疾甚立太子紹為天王自號太上皇帝

呂紹嗣偽位數月為婁兄纂所殺無年號

呂纂晉隆安四年僭即天王位改元為咸寧在位三
年為番禾太守呂超所殺

呂隆光弟寶之子與呂超同殺纂隆既僭即位超先
於番禾得小鼎以為神瑞大赦改元為神鼎在位四

年為姚興所滅

後燕慕容垂初為符堅將晉太元八年自稱燕王建

元曰燕元十一年僭即帝位改元建興至二十一年

垂死子寶嗣

慕容寶嗣偽位改元永康在位三年為蘭汗所殺晉隆

安三
年也

慕容盛寶之庶長子誅蘭汗僭即偽位改元長樂在

位三年為段璣所殺

隆安五年也

叔父熙嗣

慕容熙垂之少子嗣立誅段璣等赦殊死已下改年
曰光始在位六年為垂養子雲所殺

元正始國號大燕為幸臣離班姚仁等所殺

西秦乞伏國仁初為符堅秦川牧以晉孝武太元十年自稱大都督大將軍大單于領秦河二州牧改元

曰建義明年符登遣使署國仁苑川王在位四年弟乾歸立

乞伏乾歸自為大單于河東王赦其境內改元曰太初晉義熙三年僭稱秦王赦其境內改元曰更始在

位二十四年太初二十五年更始四年子熾磐嗣
乞伏熾磐襲偽位太赦改元曰永康晉義熙六年也

晉元熙元年熾磐立其第二子慕末為太子領撫軍

大將軍都督中外諸軍事大赦境內改元曰建弘熾磐在位十五年

乞伏慕末嗣偽位三年為赫連定所殺本傳無年號

北燕馮跋初為高雲征北大將軍錄尚書事雲為其幸臣離班姚仁所殺跋帳下督張泰李桑斬班仁推跋為主晉太元二十年乃僭稱天王於昌黎赦其境

內建元曰天平在位二十三年宋元嘉七年跋死

馮弘跋之弟跋死弘殺其子翼自立後為魏所伐奔高句麗在位六年偽號大興

南凉秃髮烏孤初為呂光將晉安帝隆安元年自稱大都督大將軍大單于西平王赦其境內年號太初在位三年弟利鹿孤立

秃髮利鹿孤晉隆安三年立既逾年赦其境內改元曰建和在位三年弟傉檀嗣

秃髮傉檀以晉元興元年僭號凉王遷於樂都改元

弘昌又改嘉平在位十三年弘昌六年嘉平七年為乞伏熾磐

所滅

南燕慕容德垂之弟垂臨終勅其子寶以鄴城委德寶既嗣位以德為丞相冀州牧承制南夏晉隆安二

年自鄴徙於滑臺明年寶為蘭汗所殺德依燕元故

事稱元年赦殊死已下置百官四年僭即皇帝位於

南郊大赦改元為建平在位五年兄子超嗣位

慕容超即位改元曰太上在位六年為晉所滅

北凉沮渠蒙遜等初推段業為凉州牧建康公改呂

光龍飛二年為神璽元年業後僭稱凉上蒙遜殺之

晉安帝隆安五年蒙遜僭稱凉州牧張掖公赦其境

內改元永康義熙八年僭即河西王位大赦境內改

元亥始置官寮如呂光為三河王故事在偽位三十

三年永安十二年亥始十六年承玄三年義和三年記不書承玄義和三年號按帝王真偽記編入

册府元龜 僭偽部 卷之二十九 二十八

子茂乾嗣

沮渠茂乾在偽位七年年號承和為後魏所滅

夏赫連勃勃初為姚興安北將軍五原公晉義熙二

年僭稱天王大單于建元曰隆昇署置百官自以匈

奴氏之苗裔也國稱大夏其後改元為鳳翔勃勃既

入長安為壇於灊上僭即皇帝位赦其境內改元為

昌武自長安還統萬以宮殿大成於是赦其境內又

改元曰真興勃勃在位十八年龍昇六年鳳翔五年
昌武元年真興七年

子昌嗣

赫連昌嗣偽位年號承光四年為魏所擒弟寔立

赫連定僭偽位於平涼年號熙光四年為魏所滅

吳揚渭淮南節度使弘農郡王行密次子行密唐天

祐三年卒長子渥繼襲是歲梁太祖既受唐禪改元

開平而渥猶稱天祐至五年渥為大將張顥所殺顥

自稱留後將納款於梁又為別將徐溫所殺以渭為

王至十六年溫册渭為天子改元武義盡二年

楊浦溫之弟渭卒浦嗣偽位改元順義盡七年又改乾

貞盡二年又改太和盡二年又改天祚盡二年遜位於李昇

前蜀王建梁開平三年以劔東南西川節度使蜀王

僭即皇帝位於成都改元武成三年改元永平五年

改元通正是年冬改元天漢又改元光天

王衍建之幼子嗣偽位改元乾德六年十二月改明

年為咸康

漢劉陟青海靜海兩軍節度使南海王隱之弟隱以

梁開平四年卒陟代據其位貞明三年陟號於廣州

國號大漢改元乾亨九年白龍見於南海改元白龍

四年改元大有凡僭號三十六年

劉玢陟長子陟卒玢嗣偽位改元光天在位一年為

弟晟所殺

劉晟即偽位改元應乾又改元乾和

劉銀晟之長子襲偽位改元太寶

閩王延均福建節度使閩王審知次子審知卒長子

延翰嗣為延均所殺延均襲位後唐長興三年上言

吳越國王錢鏐薨乞封為吳越王不報遂自稱皇帝

國號大閩改元龍啓在位十一年

王昶延均之子嗣偽位改元通文

王延羲審知之少子嗣偽位改元永隆在位六年

後蜀孟知祥後唐應順六年以劍東南西川節度使

蜀王稱帝於蜀改元明德在位一年

孟昶知祥第三子嗣偽位猶稱明德至四年冬改明

年為廣政 盡二十八
年歸皇朝

唐李昇晉天福二年以偽吳太尉錄尚事齊王受吳

禪僭即尊位國號大齊改元昇元建都於金陵尋改

國為唐在位七年

李景昇之長子嗣偽位改元保大周世宗南伐遂稱

唐國主行顯德年號

後漢劉崇周廣順元年以河東節度使僭號於大原

稱漢改名旻仍以乾祐為年號崇卒子均襲偽位

不書
年號

冊府元龜

本紀

